


T 5241 .28/399

HARVARD COLLEGE LIBRARY
FROM THE
HARVARD-YENCHING
INSTITUTE

JAN 5 1932

4

~~CHL 5237.8/399~~



江左十五子詩選卷十一目次



商丘宋 犖牧仲選

毗陵邵長蘅子湘訂
商丘宋 筠蘭揮校

蔣廷錫

題小顛墨竹

表忠觀

讀漢書八首 選二

送陶子師任昌化

華山紀遊一百韻

蝨斯

甲戌除夕

續古詩十首

同孫子逸王彤文星來兄遊金山寺十首

選一

家釀葡萄酒熟邀諸兄弟共嘗卽座成絕

句四首寄懷大兄 選一

南朝四首 選二

自三月至五月連雨不絕因用皮日休吳
中苦雨一百韻簡星來兄

六荒詩六首 選四

蠶荒
荳荒

麥荒
柴荒

長至日嚴寶成病有起色恐其復以飢寒
亂心故作此以相戒且歸之參同悟真
之旨庶除其妄而返乎真也

題許暘谷秋樹軒 暖簾

北酒和孫太史松坪

炙研和張同學漢瞻

龍燈四首 選二

寄亭司業席上分賦三物三首 選一

石花魚

家園消夏八首 鬪茶

天未明

得邵甘來中州信感賦四律 選三

和子逸夜坐韻 題汪慎為山水冊子

題席次韓閱耕小像二首 選一

讀甘來中州詩感賦

看梅十絕句 有序 選一

用東坡韻記庭中花木四首 選一

和海棠

雪後集湯西涯先生寓以林疎露山雪為

韻五首 選二

題楊晚研先生所藏陳仲美筍竹乳雀圖

題許不棄霹靂岩 涿州

琉璃河 白溝河

曉發張夏

西城晚步用姪洞韻寄懷雨亭

題畫馬賀甘來浴兒

正月廿七日舟泊虎丘示溧陽費文友毗

陵趙侯赤雨同年四首 選三

留李牟山查山讀書

汲惠泉烹茶用東坡焦干之求惠山泉韻

金山訪桐臯上人用東坡金山妙高臺韻

遊金山用東坡韻

射圃詩和劉海觀明府

露筋廟

庚辰南歸值河水泛濫淮泗居民漂溺奔
波濁浪與雉堞等今年再過河流已復
故道兩岸桑麻鬱然屋廬相望慶河復
之有時幸生民之得食爲賦長句三首
宿三岔口
宿白洋河風浪忽起舟震蕩不得寢夜半
風息早帆至宿遷

題畫竹

二蟲詩

蒼蠅

蚊

立秋日作二首

選一

中秋三更見月用子由寄東坡韻奉懷雨
亭時雨亭在徐州

綿津先生以東坡生日懸其圖像陳其詩
文率吳之士拜而祭之廷錫以冰合不
得隨羣賢之末敬賦短章紀事

江左十五子詩選卷十一目次

江左十五子詩選卷十一

蔣廷錫

揚孫常熟人著有青桐秋風片雲諸集

題小顛墨竹

畫竹不如真竹真枝葉易似難得神風晴雨露皆
有意子瞻與可無其人去歲闢地栽新竹枝葉離
披覆茅屋竹梢枯勁竿清瘦久久可以醫吾俗昨
夜雨過月上時壁上掩映青青枝張子對之無一
語淋漓潑墨發異思淡煙輕霧筆底生枝枝盡帶
風雨聲移向乾明寺中挂壁石好撰張顛名

表忠觀

流離五季徧干戈草竊英雄幸遇多一角國分唐
土地百年廟共宋山河凌煙閣上功臣像衣錦營
中駟馬歌爲問販鹽爲盜日仲謀曾許較如何

讀漢書八首 選二

秦坡宮闕鬱相望六國亡時秦也亡却賴項王三
月火漢家始得守咸陽

當年楚漢決雌雄俎上杯羹幸爾翁置酒未央稱
壽日如何獨少一侯公

送陶子師任昌化

匡州圖畫便淒然況復窮荒在日邊道險不知山

水趣法寬猶用宋元錢

高廉瓊三處皆用古錢丁卯歲制督吳公請行錢法而古錢盡廢然瓊州海外

至今未格也

月明黃木灣頭驛人語紅蕉花畔船只有一

端廉吏計木棉花發省裝綿

華山紀遊一百韻

立秋後七日六月月下弦好奇興不淺冒暑遊華
山去山三四里已無人世喧古木動微風泉聲和
潺湲蒼翠轟然起疑謂不可攀路人笑相指路在
山之彎手攜短竹杖步隨西溪灣遙過青松道斲
憩白石灘山徑一線出屈曲蛟螭蟠譬如擘腹開
人行於其間山根列大石石面千人寬上鑿雲梯

字云是第一巖路傍有古廟歲久無扃關薜荔滿
階生苔絲若垂鬟荒涼空後殿頽壞虛前軒庭中
兩大樹枝幹交相延自茲捨籃輿再休綠陰邊舉
首看鳥道盤折通山顛山身無撮土松柏瘦以堅
雜樹亂無行鬱鬱何芊芊不憚山險阻但覺興勃
焉匍匐四十級高下皆折旋泉勢陟瀟泝橫流白
雪翻澗中堆亂石大小如峰巒偏側入幽谷路窮
疑仙源須臾忽平坦天地明豁然行行四五里漸
覺升雲煙回首來時路微茫猶能辨綠野樹如薺
耳目空秦原涇渭細不見華陰小於拳山坳架臺

殿風鈴鳴四端借石起基趾隨澗縈欄杆欒櫺與
梁棟粲爛莊嚴觀石柱盤虬龍鱗甲金碧繁云昔
宋希夷此地蛻骨仙神仙畱遺跡雷電擊石穿希夷

峽壁立萬仞其石中虛土人云希夷
仙去日爲雷所擊卽希夷瘞骨處也

殿坐希夷像敷座坐聳

肩身被破布袍雙髻挽華鬢挺然得道容旣和而

且嚴我來抖塵衣再拜冰雪顏次至二上方有大上方小上方

方東西聞旃檀牽索踏層雲躡足登瑤筵瞻仰自

在相蓮座黃金鈿日月不到處一燈晝夜燃龍女

舞婆娑僧伽執幢幡白象獅子吼口舌張血殷或

挽作螺髻或帶七寶冠無定現色空如入施祇園

舍利子展轉神光明金丹僧言佛家寶可証功德
圓簷牕對瀑布倒掛深潭寒聲與清磬并琅琅亦
珊珊是時日正中嘒嘒鳴秋蟬涼風起戶內山氣
當牕前日光與樹色相射增鮮妍怡然心志樂一
坐懶欲眠牕北叢竹林低昂亂嬋娟野花開石罅
蛺蝶時翩翩仙草不識名茸茸夾道蕃山果可療
飢味同棠梨酸下卽靈官殿殿前掛紙錢此邦有
水旱邑宰修蘋蘩上有三元宮宮在西北偏芬馥
燒衆香清淨絕葷膾路險無人跡蒼苔點花牋大
石疊六七危立欹且剋已過高峰頭又臨不測淵

水深冷欲冰汲飲不敢看雲從石下生風向天上
搏侵膚欲潤體薄人疑飛騫雙嶮雙南北峰峰峰若
劍攢仰首白雲裏驚看尺五天黃河何滔滔白日
何團團衆山幾魄嶺如地置彈丸終南佳氣勝唯
見青漫漫倏忽日已斜落下黃金盤雙澗白如練
東西聞潺潺轉折山上下周迴流玉環平鋪爲慢
流激石作奔湍尋源青柯屏滴瀝蛟龍涎捫蘿緣
絕壁如歎登高難上如刺天鳥下如飲澗猿遙望
中峰頂拄天高竹竿跛羊不可上我豈能攀援上
有百尺峽水勢瀉清瀾聞名而已矣險絕非人寰

又有千尺牀狹如方寸甌仄立半壁上下虛萬仞
懸東南一峰立峰形可坐禪謂云號蓮花史冊古
所傳韓愈痛哭處至今草綿綿不知羽化士幾許
登仙玄松下茯苓藥山中芝朮田往往明月夜時
聞黃鶴言傍有玉女峰窈窕顏色鮮藜樹凝綠雲
異花驚紅蓮玉女峰有花紅色極大
詢之土人亦不知名也華山多名境周覽力
已殫行賦歸去來耳目仍留連問跡不能到探索
益自慚願假我閒身此中住十年

蝨斯

窮冬無大雪三月無陰雨旱氣產蝨斯戢戢遍禾

黍一日父生子三日子如父四日子復生五日孫
見祖蠶食田中苗啜喋壟上稔藉此民命本充彼
空虛肚葉盡本亦枯本枯窮民苦窮民苦聲騰上
干天之怒降下千萬鳥一鳥啄無數蝨斯蝨斯爾
食農之力食盡農力猶詡詡孰知天道有反覆老
鴉小雀羣食汝

甲戌除夕

閒過流光實可憐半生狼籍舊山川灞橋風雨留
殘跡瓜步雲煙憶渡船庾信聲名枯樹賦賈生經
濟治安篇此情已作今宵夢細數更籌待隔年

續古詩十首

怒焉心如擣悲哉遠行役辭家別妻子去去黃沙
磧九州百萬家豈無行路客而此何酸辛路長日
又迫一宵魂夢通千里音容隔南北分兩地素心
終不易寧爲連理枝莫作山頭石

思婦何悲歎言念洛與京京洛多芳樹蕩子難爲
情憶昔別君日秋爽江水清素心誓有日不願要
君盟妾心似江水君意如浮萍浮萍雖汎汎猶逐
江水生微風動羅綺好鳥鳴數聲君當歡宴會賤
妾含酸辛

松蘿良有托葛蔓亦有依丘中一貧士四海無所
歸日飲澗中水朝採山上薇天寒水結冰年深薇
漸稀浩吟悲哉行君子其庶幾遊魚躍池樂苑馬
騰櫪肥豈知鴻鵠志不逐燕雀飛

冰薄玉壺清絃急朱絲直可憐毫髮瑕丘山無由
識團扇感君恩涼風情愛息狐腋重千金夏日不
可飾春風桃李貌秋霽芙蓉色萬物成者退天道
惡盈極

娉婷空村女窈窕顏如玉十年不得字熒熒抱幽
獨秋風吹羅幃庭草黃以綠蟋蟀鳴階除飛蛾拂

暗燭良日豈無媒恩情恐反覆顧彼邯鄲女能唱
新翻曲一唱感君心再唱迴君目三唱君愛深後
宮先斥逐

明月何皎潔涼風何霏微照我杯中酒拂我身上
衣我衣亦已敝我酒猶滿卮停杯不能語中心有
所思太行路險阻駑馬安得馳大海足波濤舟楫
無從維西方有美人三年與我期願爲楊柳花到
處隨風吹

騎射并州兒輕肥相馳逐草淺獸正肥弓和手還
熟羽毛落風雨驚駭曾網觸狐兔走無遺鳥雀死

相續人樂歡已慙馬怒驕未伏一朝羽檄飛邊城
寇反覆軍行點有名帶劔據鞍哭

青青園中葵傾吐向日心下有沒徑草上有喬松
林悠然思我友託彼以斷金離別異今昔有懷不
得陳懷哉復懷哉撫我高山琴

家寒憐范叔陰謀異陳平十五誦詩書三十無所
成廣川容細流聲氣溢羣英半生已淪落一歲住
咸京咸京興亡地懷古多悲情信美非我土還望
闔閭城歸來面目黑見者頻相驚不如枝上鳥常
作故鄉聲

織雲西北起須臾天地黑狂風與之俱雲厚風性
直人行急欲仆白日倏西匿吹折壠上麻落盡園
中色雲散風之功雲來風有力嗟哉爾風意不爲
羣動息

同孫子逸王彤文星來兄遊金山寺十首

選一

振衣直上留雲處

上有雷雲亭

景盡江天一覽中
匝山

形迴北固瀟騰潮勢卷南風斜陽鳥背飛天外雙
塔鈴聲語半空聞說江干饒月色煙波輸卻釣魚
翁

家釀葡萄酒熟邀諸兄弟共嘗卽座成絕句

四首寄懷大兄

選一

近有新詩寄子由十年風雨意悠悠京師麩蘖無

佳味聊比青州是易州

京師惟易酒可飲

南朝四首

選二

秦淮流水去無情含露妖姬出後庭百幅錦帆楊
柳月陳宮未悟曉鶯聲

望仙閣上捲瓊鈎鐵鎖橫江那用愁回首降幡颺
一片又教阿麼送揚州

自三月至五月連雨不絕因用皮日休吳中
苦雨一百韻簡星來兄

澤國多水田區畝界澮瀆三江足灌溉不慮陂池
澆年來瞻四方所騁靡蹙蹙糠粃戒膏梁頽塌悲
夏屋去歲見妖異寒雷鳴轂轂中夜發浩歎農事
念唯谷窮冬行春令陽氣未收伏荒歉災已形難
為掩邊幅憂心日擾擾飄搖風中燾陽極反於陰
旄頭占西陸星象占旄頭
白則多大水開春便大雪雪花手掌撲
嚴寒入骨髓中之如中鏃吾邑一彈丸蝸角寄蠻
觸地卑水尾閭雨過河飛瀑那堪會蛟龍野戰閃
電目汨流日涓涓破轂又喪輻逸詩涓涓流水不壅不
塞轂既破矣又喪其輻懷
襄勢可懼如在澤中宿春麥化飛蛾萬性命已戮

天公意未闌入夏轉菽菽屏翳閉天關豐隆迴地
軸塗巷變溝坑波濤平旱麓空庭過傾盆繼之以
霹靂棲鳥濕不下枝頭翅相築陰暄入穴藏魚噉
濺沫綠須臾黑雲合蚊蚋飛躑躅屋中濕氣蒸柱
礎潤若沃堂內滑綠苔側行惴趑趑開戶卽浩蕩
恍疑居艗縮時聞家人語飢寒痛咻噢咫尺隔雨
絕舉足如物鍋逢庚始入梅遇壬梅已熟素壁生
白菌閒牕閉莎菜高樹落破巢荒原漂木櫝船從
橋上行蛙入釜中浴悲哉絳縣老同此泥塗辱浸
竈未能炊漉米空勞奠沃土等不毛楊墨何蹙蹙

乍瞻寸日光幽都見龍燭人居負郭者張網候鮪
鮒使令魚作鱠安能勝糜肉山柴頓增價百錢易
一束一束無五斤炊鍋猶不足崩頽空牆壁淋漓
遍箱簾布袍遭敗黝黑白變偏裂筋骨病解散手
足疾癰痲炎蒸蘊肺腑四體渾如木田中秧已盡
敢望迎露粟曲突無青煙飢烏啄空腹十里九里
水十家九家哭井稅供長官斗儲仰田僕帝閭無
從叩憂懷來簇簇木頭驗點土八極雨態蓄滴瀝
來樹頭庭階翻白醖高原作平澤傷麥復殺菽安
得反陽侯招魂設羹臠豈是飛廉車磔裂不可服

願提精陽劍兼學驅雷錄白日掛銅鉦明月懸空
玉夜臥聽霽霖寸中愁萬斛心期破雲翳夢作高
飛鵠曉起辨陰晴屋頭鳩婦逐白晝忽如夜林木
爲潤黷嗟予陋巷中蠅處而蝟縮雖不減三餐閉
門亦窮蹶懸灰未可信蟻穴聊以卜天道十則極
陰陽有反覆竹逕壓離披新枝競拊扑石髮長牆
隈蝸牛出樹腹浸潤黑書縫滴漏侵牀褥對酒不
能飲彈棊不終局因懷陸先生斗室雙膝促世途
遇更窮吾道信彌篤浩吟興非淺短句和長曲遊
刃驚恢恢竭思歎翬翬

漢書願賜數刻之
閒極竭翬翬之思

三年附吟社

詩箋頻往復遺音繼魏晉竹枝愧巴濮心志既同
好本支復同族我兄亦我師君唱我還續詩學誇
家雞書法求野鷺星來兄詩成輒求子逸書之所嗟運數奇風月老
杜牧二旬風雨阻春秋異蘭菊相隔雖參商遙望
如朮胸天神詠簷雷山帶還相矚寄我水災詩苦
怨蒼蒼酷備詳生民慘微言可朗讀字字珠吞吐
聲聲金躑躅災害古所有未若今歲速重陰結不
散牛馬寒穀觶縣官急征供催科窮桎梏歲荒多
犯罪豈能恤盈獄小吏食民膏膏盡未逞欲可憐
天聽高有恨不可告昔羨多田富今覺無田福民

命已亡羊人心癡得鹿獨我與先生唯宜飲醪醪
爐中焚艾葉鼎內煮菖歎南方多濕病足疲手指
瘰况當蠱粟災安望生野穀謂吟苦雨詩飽餐休
笑溽明歲腹應枵煩君設豆粥

六荒詩六首 選四

蠶荒

吳民事蠶絲燥濕惟時候今年三月前霹靂潤土
厚蠶婦欣相告可保蠶有收有綿白如雪有絲細
如縷曠風護蠶子子出衆且驟一線黑如鍼初眠
已昂首婦姑理筐筥父子晝夜守誰知連旬雨桑

枝爛若蹂重陰錮微陽葉葉皮縮皺水氣毒中蠶
蠶死首相湊蠶婦長歎泣天公何訛謬訛謬勿復
道相約毀絲扣

麥荒

春秋輕他穀無麥則書之所以古帝王勸種毋失
時百穀最先登乏食唯賴茲每讀爾雅註麥者繼
絕詞太陰傷首種常使農人飢油油數千頃空爛
靡有遺大麥既淹死小麥亦披離誰借霹靂車收
之入地祇農夫束手待野老吞聲悲一雨千萬淚
天公胡不知

荳荒

西北多高田種花亦種荳夏至二十日播植唯其
候刈草復治穢深耕還淺耨疎根欲其乾糞土欲
其厚望莢成二七不先亦不後

呂覽得時之荳
其莢二七爲族

誰知入

五月雨下大且驟荳苗未盈寸披靡倒若蹂水浸
及濕蒸空敗不可救綿連勢更甚長草如長寇屏
水倏復盈築岸旋已仆浩歌南山詩酌酒聊自酬

柴荒

庭中多草萊階下多松竹朝取炊晨餐夜拾煮夜
粥松竹易以盡草萊生不足朝持千錢去暮還易

一束濕重不可燒漉米不能熟八口望曲突嗷嗷
笑枵腹前月山中行山木猶簇簇今從山下過遙
望山尖禿農民無以爨焚卻水車軸田事更無望
拆屋入城鬻鬻之富貴家可以爛魚肉

長至日嚴寶成病有起色恐其復以飢寒亂
心故作此以相戒且歸之參同悟真之旨庶
除其妄而返乎真也

冬灰應律發地軫蟄蟲伏獸思蠢蠢君疾有喜已
勿藥細看面目相表診與君歡喜爲君戒惡石由
來勝美疾古人去疾如芟草草根不拔疾不盡文

章得失竟何益搜滌曲腸琢肝腎龍門浪起千丈
高都半蛟螭與蝼蚓胡爲大好欲誰問人怪何如
得人哂長安戶口百萬家是處號啼嗟可憫甌中
有米身有袴溫飽何言客況窘設令飢寒能困人
飢寒且爲性命忍貧賤從來我輩常丈夫豈得終
畦畛君能排決兩般愁譬如籠馬脫鞵鞞會看黃
色散眉間行見紅光生額準更爲君進養生說願
君細究勿矛盾形骸筋骨本朽物三十六節氣相
引自泥丸至尾閭
凡三十六節其間呼吸似橐籥不死之門在玄牝
玄牝逆入黃庭中朱衣人閉玉關緊見聞總屬希

夷間守中嚴如守天困是爲冬至子之半兩儀初
判天無昧毋勞爾形搖爾精斯義傳自函關尹

題許暘谷秋樹軒

秋樹冷落如幽人羞與草木共行伍幽人本與秋
有素招邀落葉滿庭戶盤坳曲節起山連擁腫根
株伏瓜窳號風夜半潮奔騰吟雨朝來琴搏拊旁
有東陽老屋基規模不敢比堂宇遂以秋樹名其
軒負米讀書懷杜甫東陽眼力窮天真穉毳布地
坐交股輒然一笑忘我身木葉離披日正午銅山
秋茶初發香蟹眼煎成潑新乳閉門詠嘯秋樹根

收攬秋光得十五四時平分日月運東陽與秋亦
何取紛紜桃李不關心秋樹幽人作賓主

暖簾

天地倏閉塞峭勁風頭尖入戶刺人骨快如戈戟
銛富家設繡幕一幕用十縑貧家買麤布一布置
一簾隨手截長短規戶裁稜廉合以麻與線裹以
艾與蒹寒威塞北向暖意生南欄野馬積堦砌名
香閉銅匳研滴膠遲遲爐火消漸漸埽室具酒盞
拂几排書籤有客入門來水花結髭髯天街跼蹐
路衫袖黃塵黏寒幃忽自失顧乃爭豪織鞞手旋

不龜彊舌頓發箝儼若施氈帳何異垂車檐雖非同昌比亦足除凝嚴珠箔冷寂寂絳幃輕檐檐不如兩幅素可爲我覆苦因思布簾力坐使風性恬慎勿出門去雨雪悲靡瞻

北酒和孫太史松坪

人情渺難合物理不可仗所好有時棄所惡有時賞嗟予本南客今爲北酒黨是豈性所甘抑亦習所強憶初來京師時遇朋酒饗味或苦如荼氣或臭于菴十分未接唇半盞猶置掌道傍逢麴車斥之同糞壤恍然蘇州味喉舌猶可想謹謝曳盞謔

對案空怏怏居處未一月酒腸發悶癢論杯限分數斷瓶買斤兩初如疾飲藥漸若飢食椽支體動條達血脈活俯仰始歎功力倍反覺氣味爽迎來樂融融絕去憂養養王績酒品中北酒當爲上新州多美醞其法不足倣適口忘正味嗜好異疇曩土窟與石凍遂得相標榜焦革有釀譜杜康有遺象嗟酒遇何偏笑予言之獎北酒未知感南酒已稱枉稱枉勿復道陶然醉蒼莽

炙研和張同學漢瞻

石硯在端溪曾未經太陽嗟此本冷物安能爲熱

腸寒風吹書幌几案一尺僵磨墨似擁雪掃筆如
拂霜謂宜求野火幻出得熱方鐵架排四足熾炭
安中央要使上下間其氣兩相將案間寒氣弱爐
內火力強不愁攻太逼惟慮灰或揚墨花春散煖
松麝輕浮香堅冰化凝滴金斗融寒漿但令筆頭
潤寧顧石質傷羊肝燒已黑蕉葉炙漸黃可憐文
翰間頓作水火場

龍燈四首 選二

鼓聲喧處一條紅頭角玲瓏面面通可惜此中如
許大攀鱗都是小兒童

千點燈光十丈身一燈還照一龍鱗饒渠遍體黃
金色未必飛騰負得人

寄亭司業席上分賦三物三首 選一

石花魚 得錫字

石峽開天門峭崖削兩壁

鷹窠嶺之下名曰天門石花魚所出處也見保德州志

山形

束水勢水石相排擊排擊非一朝青苔生的的年
深苔剝落橫波競蕩滌中有三尺鯉逆流翻霹靂
目爲泥所昏鯁爲浪所激龍門一戰退湖海千里
逖困鱗未得蘇空腹愁已怒河流瀉地來石花浮
泝澗既不變頭角但願得飽喫游泳隨上下唯食

所從適喁唵漸活動尾鬢光的爍方向濁波藏豈
意漁人覲那知浩蕩中無處避鋒鏑京師貴方味
凡品同瓦礫欲嘗一嚙美不惜十金覓往還數日
間形質未轉轍赤尾出青籃寒冰凍玉瀝提攜入
庖廚馨香薦鼎鬲作膾干片飛落刀一聲若肥美
少熊掌鬆脆異脾析入脣肉已化點案脂欲滴味
厚勝黿羹色輕等粉錫還愁食易盡骨肉爭剗剔
衆言席上珍我爲枯魚感美物難終年不見彼社
櫟

家園消夏八首

荒畦種蠶苳小圃栽蘿蒿蒿長苳莢大摘採寧辭
勞驅愁似避瘧尋樂如追逃緬懷一畝宮猶是先
人膏一時功名意于我吹鴻毛清晨石上立爽氣
西山高

會意不在遠偶吟興自適松花綴黃玉香氣發蒸
栗落粉如飯煮不向道人乞靜觀草木趣閒得魚
鳥逸看月有隙地琴彈有壤室世事比獅子解弄
得六出來日苦尚多得失那可必

閒行西山麓殘陽沒牛背山石亂犖确微逕訪陸

又

讀艾謂五經欣有對碩人幸參會

時于畏之玄對新義

畏之也

齋遇湘靈先生

汲廢井玄言破累魄斐然君子文弼中而彪外瑟
瑟玉塵風披靡草蔚蒼相別復廿日斯景猶好在

畏之往郡湘靈
先生亦去鄉下

相期秋風來吳江煮鱸膾

舊年栽新竹今年竹無數綠閉北牕紗空庭聽鳥
語南軒傍水開擎荷盡軒舉跳魚躍水珠荷葉瀉
幾縷一陣葉戰風交加互撐拄池邊看水痕已減
昨日雨昨日誰家池掘藕盈筐筥粉股濯清泉玉
段埋泥土安得大如船仙人不我許

草長塞三徑芟拔爲鉏荒獨畱蜀葵花紅白遙相
望綠蘿深窈窕高松倚青蒼雖無向日心而得枝

葉昌庭前堆亂石橫臥如羣羊還疑身入羣對石
兩相忘

茅屋架三間器皿不礮斲蓬頭兩奴子執事亦端
慤磨墨請我書落筆重隕電臂強指節酸性鈍不
能學風雲變三朶筆勢搖五岳秦碑辨難認點畫
奇駁犖回頭顧奴子自覺其形渥不看千里駒三
日見頭角

出戶如出境到家如到邨風來荳棚下月上西南
垣自從居此舍已見桐生孫深慙宅相兆終汙通

德門

余所居外王父
本芝公舊宅也

緬懷五舅氏二歿惟三存滄桑世

變易未免嗟壺餐壺餐亦幾何有恨不得論我身
幸不死我將告我昆

惘惘出門去歸家已一年家人不我誚畱我沽酒
錢蘇生雖不遇猶有負郭田窮達一由命何事悲
青氈麪中論清濁杯底分聖賢富貴會有時食客
當三千

鬪茶

綠暗蘄門雨筐篋摘葉柔全憑茶博士差遣酪蒼
頭文火輕如篆長泉活似油紅砂新水硃去聲白定
小磁甌蟾背翻旋沫魚珠躍亂漚松風雲影散花

氣雪光浮陽羨春還嫩鴉山色更優一旗開雨腋

三碗潤枯喉洗器香猶在看痕水未收

建安鬪茶以水
痕先沒者為負

久者為勝性清元易汙種別各相讐隨口分高下從人
道好不每因烹汲惡常為葉嘉羞

天未明

星稀月出天未明室中蚊市歌嘲轟呼僮點起松
明火火光燭戶蒼蠅驚蚊兒拂面蠅觸紙一時噉
譟無數聲竹牀颯颯鼠過空庭拍拍蝠燕爭咻
喞叫嘯老鴉語籬邊斷續蟋蟀鳴此聲聒耳皆惡
境使我臥立心怦怦急撲滅火倒頭睡白日上腹

松風清

得邵甘來中州信感賦四律

選三

南薰坊下送征塵又是昆明一劫新
老大幾時猶作客去留無主強依人
煮茶石上龍團熟醒酒臺邊土窟春
若是使君知此趣風流還稱對佳賓
昔年郊野逐行旌馬上風煙今古情
枯木遠當人面立白雲低向屋頭生
召陵地僻初無縣博浪沙橫舊有城
零落雄圖同悵望驛亭爲我覓題名
景物雖佳詠式微好將拂水浣征衣
波晴南浦菱初老風起吳江鱸正肥
得雨蜻蜓離甲去辭巢燕

子背人飛相如坐右非枚叟謾戀梁園不早歸

和子逸夜坐韻

蘋末風生白葛輕小庭景物又秋聲
相看酒戶隨年減賸有詩懷入夜清
荷葉翻時珠露瀉荳花香處亂蛩鳴
桐軒莫謂無多地一片寬閒江海情

題汪慎爲山水冊子

山水畫神不畫骨紛紛畫匠何足數
天地設景本奇怪世人卻以寸管分規矩
株呈豆算雖無疵竅趣已失十之五
五日一水十日山作者毋乃用心苦
君看張旭醉後作草書以頭當筆墨當土
此時

豈暇分妍媸唯覺驚蛇翥鳳字畫舞慎爲先生亦是張顛徒身名一醉付莽鹵醉鄉別自有天地奇景重掩在肺腑蒼蒼世界悉包舉渺渺煙霞恣吞吐精神一片墨灑出生成泉石無剜補小松幾寸千尺風煙樹幾叢百里雨硯頭靈鷲自飛來海面金鰲失左股余雖不畫喜論畫今觀君畫決吾瞽想見大醉潑墨時有如牛飲氣一鼓所恨平生未識面得見畫古如貌古吁嗟斯人斯畫不可得收入郭熙林泉高致譜

題席次韓閱耕小像二首

選一

夜雨平明漲一犁綠楊如綫稻如萋此中應有詩人住草屋三間似灤西

讀甘來中州詩感賦

東京遺跡昔曾過有客新成五噫歌芳草路隅看寶玦荒荆宮外指銅駝傷心世事相响沫轉瞬流年共刹那當日歡娛今日淚平生趙李竟如何

看梅十絕句

有序
選一

去年家大兄移老梅百樹植于丙舍之傍今春花發時與星來兄徘徊其下一樹一態一花一香雖悅目無多而廣平所擬議亦庶幾備其情

狀矣鄧尉之千株萬樹苟非吾有奚足賞哉正
月廿二日書于木瀆舟次

橫列春山翠帳開幾株相映白皚皚輕煙未散月
未上放鶴亭邊雪欲來

用東坡韻記庭中花木四首

選一

和海棠

庭荒地僻無嘉木海棠一樹抱幽獨花枝半落主
人來應令名花笑人俗碧雞坊裏錦作堆燕王宮
下艷成谷花胡不向此中開卻弄春光覆茅屋慚
無高燭照紅粧幸有頽垣遮粉肉殘枝畱得烟霧

微嬌態可憐風雨足花前偶坐轉淒涼月下重來
更清淑主人從此看殷勤還餐落蕊撐空腹譬如
北人不識笋長鐺大釜煮枯竹翻恨開時不來看
如今落去空瞪目憶得前年海棠院猩紅十樹如
西蜀今年又見江南春雪中爪印看鴻鵠此花棄
置賞者誰聽我花開花謝曲倒頭醉臥海棠根根
外靈犀同背觸

雪後集湯西涯先生寓以林疎露山雪爲韻

五首

選二

先生心尚遠詠懷綜琴書清遊步東觀曲宴旋直

廬寒冰落修雷積雪飛空除門前車馬散庭畔煙
樹疎相攜不速客紅爐烹園蔬

出門燈火靜街明凍殘雪未覺吟肩寒應知酒腸
熱歸來立空庭月冷霜華結庭前枯竹竿蕭蕭歲
寒節

題楊晚研先生所藏陳仲美筍竹乳雀圖

古人寫意不寫形後人見畫如見真花竹翎毛小
技耳此中妙理難端臻鳴鳩乳燕寒不起玉堂素
壁挂好春兩枝綠竹抱粉節兩枝高筍干青雲霜
籜斑斕半落地低昂一雀閑且馴雛兒引領顧其

母舒張雙足行逡循老雀授意聳而立雀雛接食
翅轉伸誰其畫者陳仲美傳是至正能詩人以畫
作詩詩細膩以詩作畫畫入神至今三百有餘載
粉光墨氣常如新嗟予亦好弄顏色無奈見與兒
童親安知此種本天趣發揚英妙含精勻願借壁
根臥三日芒角洗我胸中塵

題許不器霹靂岩

朱欄路盡石壁出天闔決裂地垠坼羣峰俯伏列
兒孫乃翁高臥在百尺曹溪半角海上飛女媧餘
石紛騰擲仙人狡獪起羊羣誕說虛無落雁翻此

石又從何處來強將名字鐫霹靂畫圖指點不分
明覩名思義難忖測清宵魂夢甚安適忽然寒風
吹肌骨闐闐雷聲震屋壁阿香掉車揮矢石冰雹
交加氣結轆驚汗浹背眠不得急起呼童疾磨墨
題詩爲謝高陽生莫作雷聲來恐嚇

涿州

遠樹微茫綴碧空范陽驛畔塔鈴風驚回驢背江
南夢恍似金山落照中

驛在涿州城西驛傍有浮圖卽范成大詩屋頭白塔滿鈴風也

琉璃河

劉李河邊桃李稀行人猶未試春衣祥符空記乘

輶錄不見鴛鴦捉對飛

白溝河

安肅軍邊策馬過涓流如帶不爭多兩河已付耿

南仲卻要區區巨馬河

白溝河宋名巨馬河去安肅軍數里

曉發張夏

星殘月落樹茫茫溪水中分兩岸霜茅店忽聞鷄
再唱亂山缺處漏紅光

西城晚步用姪洞韻寄懷雨亭

井梧庭竹已秋風唯有登臨興未窮高閣三層煙
樹裏青山一角夕陽中幾行雁齒斜城界萬井魚

鱗碧瓦叢眼力微茫天地濶兩湖如鏡漾晴空

題畫馬賀甘來浴兒

南人見船不見馬畫馬獨數東城徐徐允平奔塵嚙

草不一式風髻霧鬣憑空虛吾從徐生得粉本皮

骨停勻蹄足穩耳尖卓立如竹披夾鏡雙瞳車轂

眼讀懇本
考工記斑爛汗血千里駒天矯不受羈轡拘昂頭

奮尾老馬側撐肩摩癢相挪揄何從得來此位置

解意能通馬腹事聊將畫本試鈎臨白馬非馬亦

兒戲古推畫馬江都王五百年來猶寶藏書生筆

底少顏色卻令素絹忽生照夜光君不見龍池昨

夜飛霹靂王良星走十丈芒文殊獅子據地吼邵
家新得真乘黃

正月廿七日舟泊虎丘示溧陽費文友毗陵

趙侯赤雨同年四首選三

兩年憂患抱艱辛還向昆明溯劫塵數仞牆邊悲

棘木三條燭下記楓宸夢中宮闕招殘魄眼底山

川認故身不是玉皇親判與祇應常作謫仙人

騰空野火歎如焚狐鼠憑依正聚羣天上有星皆

卷舌人間無日不斜曛魂歸雁蕩生春草鶴去遼

西隔暮雲惆悵史遷知己盡一篇貨殖是遺文

春雨如絲和涕零傷心數語夕陽亭漫天只仗修
羅掌入地還逢貫索星墮淚故人澆漢獄叫閹新
鬼遶王庭淒涼陸氏荒莊在若箇門生爲勒銘

留李牟山查山讀書

公子休歸去查山可讀書湖光搖几席嵐翠接空

虛高閣有賢主

六浮主人
張籲三

雲深卽敞廬

先人丙舍在五雲
峰下去查山五里

而相逢莫相訊欲語已欷歔

汲惠泉烹茶用東坡焦千之求惠山泉韻

平生喜茗飲常恨不滿腹所以水高下頗能辨類
族吾邑泉最多高道有井蓄翦菊與睢陽盈竭時

斷續沈亭出土穴味重如擊筑舜過發涓涓淡薄

苦迫蹙

高道在西山翦菊睢陽在
城內沈亭舜過在北山

自誇弄泉手諸品不可

瀆今來惠山下幻色澄空綠精光射玻璃寒氣結
水玉小杓自攜將大瓢付童僕夜瓶雪欲翻春甕
月可掬付之活火烹松風散芳馥蓬牕呶吾苦忽
報茶已熟快啜潤枯腸莫辭飲一斛

金山訪桐臯上人用東坡金山妙高臺韻

日暮乘輕橈來訪桐臯子風清水不波江面無二
里樓臺絢金碧相望咫尺耳江心一拳石蒼翠突
兀起迴廊四周曲山徑坦如砥師住妙高臺翰墨

淨牕几新詩抱冰雪朗誦漱牙齒神機觸箭鋒活
潑如江水愧予非坡公師寔了元是願師塞其竅
無鑿混沌死

遊金山用東坡韻

天地不知幾許大唯覺眼力直到海迴頭北望古

都城六朝金粉依稀在山中精舍乞祇陀誰架飛

閣臨洪波新造來鶴樓
俯瞰江上太平有象戰鼓歇海潮打石

鐘磬多燕子雙飛亂小楫江船小者
名雙飛燕夕陽掛帆江浴

日東南雲氣半天霞日光反射江心赤此景奇絕

動魂魄魚鷹出沒江豚黑須臾兩岸燈火明舟人

促歸波浪驚山僧相對不相識此中空洞元無物

七年兩度登此山乙亥三月同王
彤文登金山廓我耳目破我頑欲

歸餘興不可已舉盞更酌中冷水

射圃詩和劉海觀明府

余年十三四性狂喜擊劍旋轉若有神不容目睫

見氣競竇旅剽服異短後賤時捍烏號弓亦彎綦

衛箭憶昔南陽城平原草方蒨丙寅春侍從先
大夫于南陽馬閑身

體輕縱轡樂澶漫草中伏狡兔急竄如避鍊人喧

馬亦驚耳立雙眼爛張弓擬滿月鳴鏑激奔電弦

合兔已摧取視兩腋貫氣矜顧盼雄能者亦欣歎

歸來餉賓客仍作射兔讚稍長知折節言及輒顏
汗詩書架承塵鉛黃滿几案好尚與昔殊無異去
河漢儒冠銷壯心墨翰弱臂腕去年客京華向人
借款段猶嫌馬足疾恍忽易顛擻弓雖一石輕手
重五斤判居然文弱生永與弓馬斷先生大作手
何忽弄胡援毋乃有激云抑亦與世玩深慙先生
問棄功幸未半會當調軟弓從獵淺草畔

露筋廟

落日秦郵道淒涼貞女祠飛蚊三尺喙行露一篇
詩濁浪時飄瓦炎風自捲旗漫漫長夜恨畢竟少

人知

庚辰南歸值河水泛濫淮泗居民漂溺奔波
濁浪與雉堞等今年再過河流已復故道兩
岸桑麻鬱然屋廬相望慶河復之有時幸生
民之得食爲賦長句三首

一葉衝濤記去年清河城下水連天魚龍吹沫浮

蘆屋

淮泗居人皆編蘆作室

鷗鷺凌波宿柳田

近河荒地遍種楊柳土人名曰柳田瓠

子河邊無竹榭澶州橋上有行船齧堤溢野悲禾
黍恣食唯餘五斗鱸

今年水勢避城垣徙窟蛟螭不敢喧古戍空時看

麗譙

河水發時多用河兵防守或二里三里一置水復則十里二十里一置

人家低處亦郊原

馬牛歷歷皆能辨衣帶盈盈好問源寄語河神莫

驕怒吾君側目屬黎元

治河從古乏良謀硯席書生動杞憂但說長茨堪

置石

漢書注長茨卽竹葦所以引置土石

可知濁浪易沈牛水痕約略餘

三阪奇計分明借一籌不是九重宵旰慮誰將

隻手障黃流

宿三岔口

安流發浩歌高岸半銜日火雲四脚垂遠樹青歷
歷須臾大星明光景動魂魄晴雲映河水黃流亦

澄碧忽然心地寬欲吞雲夢澤

宿白洋河風浪忽起舟震蕩不得寢夜半風

息早帆至宿遷

炎雲忽破散黑浪吹天風檣竿颯然響篷索鳴笙
鏞浪花動鱗甲彌覺此語工兩舟相摩擊未免震
我躬恓怛百憂集此生真途窮甕底有餘酒急起
觴十鍾酒乾風亦止穩夢還家中夢醒又何處帆
掛鍾吾東

題畫竹

雞栖蝟縮篷牕中炎風著體何熻熻吾家三徑有

好風修竹千個綠雨濛濛毫染色寫兩叢一叢直
竿凌霄空枝葉亂舞飛蒙茸一叢斜出偏向東竹
竿曲屈如彎弓須知此意來虛冲蕭郎下筆將無
同兩枝枯竹頭且童勁節中斷如截葱高石矗起
疑九竇石根亂草驚飛蓬坐玩不覺歌颯颯清涼
沁心消蘊隆

二蟲詩

蒼蠅

蠶蟲化入土蠅族實蔓滋果然垂大腹
說文蟲之大腹者輕
乃等忝索飛飛集糞壤營營遍九達瞠然出兩目

香臭悉預知夏日宴賓客滿案堆甘飴主賓未下
箸此物已朶頤或藏千金壁白潔逾瓊芝爾蠅來
至止識者悲磷緇或能附驥尾遠致千里思或能
窺御筆爲王宣綸絲或亦亂雞鳴再歌齊后詩或
來賀及第八行媚所私死因嗜肉汁醉卽投醕池
鷹頭集固巧故紙鑽非癡適從何處來入戶披我
帷不能碎豆擊輒欲拔劍追天公肆長養此意令
我疑大鵬有兩翼何不撲殺之

蚊

晴天雷殷殷乃是蚊聚市勿謂一物微亦足傷吾

體叶遊戲來東方中庭舞靡靡雄豪花鷹推翫髀
宿鴨比喻爾入高堂翕然窺卑痺巧密綠紗厨拙
悞隔羅綺軟則嚙皮膚硬卽啄髓髀噬血聳高尻
得意奮利背中宵發奇癢爬搔不可止起來桓桓
擊漢書擊之桓桓僵仆滿牀第火攻意未快掌捫血染指主
人雖被創汝亦狼藉死南海有蚊母江東有蚊樹
叶朝吐復暮生爾族何時已有蚊不敢驅哀哉吳
孝子

立秋日作二首七月五日 選一

天空清淨足秋光高棟層軒更覺涼狂叫預愁逢

壁蠍少陵七月六日詩 每愁中夜自足蠍微吟且自和糟牀東坡七月五日詩 還復此微吟往和
糟牀注晚瓜最愛龍蹄熟新棗先嘗羊角香誰爲潘
郎感么膺織絺輕篔正堪傷

中秋三更見月用子由寄東坡韻奉懷雨亭
時雨亭在徐州

三更吐月天宇高空庭竹柏明秋毫浮雲欲遮遮
不得劈開破絮推銀濤昔日彭城子由子愛看月
色坐秋水雲龍山頭千丈光隱隱黃樓笛聲起笛
聲愁絕落金丸彭城形勢黃河蟠築城捍水畱遺
跡城頭露落兄衣寒今夜何人臨古汴水光灑激

魚龍變賓朋笑指白玉盤使君醉拍紅牙板前年
築堤如築山今年堤成山更堅應無驚濤蕩月魄
時得穩臥推篷看河邊看月月愈好如帶河流繞
秋草酒樓隱約望黃樓還似子由憶坡老酒樓李
白老更貧黃樓明月常照人每憶黃樓看月出身
是徐州門下客

綿津先生以東坡生日懸其圖像陳其詩文
率吳之士拜而祭之廷錫以冰合不得隨羣
賢之末敬賦短章紀事

歲在執徐月在丑風狂雪大寒氣陡晨興接得汪

子武曹書醉筆欹斜字難剖摩挲倦眼更瞪視知是

商丘公爲坡仙壽按得當年玉局文誕在嘉平月
十九風流雲散幾百年今得吾公追尚友高懸圖
像設詩文登堂而拜有某某西園勝事絕代無而
況此舉真希有飄飄白雪結玲瓏瑟瑟寒風更颯
颯鼓枻衝波興已飛一夜河冰遲下走鯁生無分
到梁園敢慕相如居客右還想羣賢竭濟蹌揮毫
奮筆爭先後恰如白戰聚星堂寸鐵不持唯素手
裁紅暈碧非我能天公無乃藏余醜感公此意三
歎息起爲坡仙九頓首山芋和作玉糝羹白水釀

成眞一酒遙祝坡仙并祝公南山有栲北山杻

江左十五子詩選卷十一

[Faint bleed-through text from the reverse side of the page, including characters like 成眞, 酒, 遙, 祝, 坡, 仙, 并, 祝, 公, 南, 山, 有, 栲, 北, 山, 杻]

江左十五子詩選卷十二目次

商丘宋 犖牧仲選

毘陵邵長蘅子湘訂
商丘宋韋金經一校

繆沅

遊北固山甘露寺觀山後一帶峭壁

欹帆石歌 楊子江

劍池再疊商丘公龍井茶韻

舟次玉峰偶感傳是樓往事三疊前韻

丘南是汪堯峰先生著書處

舟行雜詩用商丘公韋菴閒興韻三首 二選

白龍潭上廢寺

青衣泉

登鳳山頂望錢唐江

靈隱寺

龕山望海

鏡湖放歌

晚游吼山

鮑山

題鼓山山下廢署

宿雲門寺

娥江舟次讀商丘公近詩偶有所觸輒成

斷句雜用滄浪卷中韻十七首

選四

野泛

菱溪道中

蠡山用商丘公丁卯橋韻

半月泉再疊前韻
西栗樹

蔬食後甚飽有作

塘西悼金介山呂山瀏

草堂酒熟侍家大人作

房中行

山雨乍霽由桃花澗歷天開岩觀禹碑望

最高峰慨然有出世之想

西溪大石

焦山僧葺山志初成索予題句因書卷尾

芽村
打麥詞

采桑詞

射鴨詞

采茶詞

渡江疊集宮丈恕堂韻

小忽雷歌

有序

袁浦贈佟振北

淮陰詠古德州田公座上分賦

袁術

陳登

蕭望之

枚乘

馬宮

孟喜

嚴彭祖

書德州田公黔南山水詩後十五首

選十

秋日廣陵雜興和商丘公八首

選二

前題和宋山言

選二

六境圖

有序

洗墨池

忘歸巖

潞亭

鵲華秋色堂

煙江疊嶂堂

滄浪亭

商丘公賑饑興化口占奉懷三首

選二

玉帶生歌

海陵舟次喜晤宋山言孝廉

齋居

草堂疊石初成贈李老

同舍弟甸洋坐花嶼

新堂種竹用石湖盤龍驛韻

小至日登蔣山晚憩靈谷寺用李北海荆

門關韻

觀音巖望雪四疊前韻

新洲看月六疊前韻時有故鄉僧話石梁
峯頂之勝

江左十五子詩選卷十二目次

江左十五子詩選卷十二

繆沅

湘芷泰州人著有蘭渚浮山西溪諸集

遊北固山甘露寺觀山後一帶峭壁

夢中涉江如涉溪醒來呀啞聞天鷄飛槳聲中三
老語洪厓隱隱相招攜霜濃日暖衆峰露芒鞋竹
杖窮攀躋初經磽确達廣陌漸入蒙密穿修蹊南
徐勝槩壓眼出北固高聳排雲齊如羊狼石臥山
麓吳蜀往事纏心脾遺隍剩礎不復辨江聲悲健
雜鼓鞞甘露寺高結凍蛻山空無人草萋萋積鐵
橫飛百尺塔攢青低散千張犁旁行畧約轉危阪

登降扶舁煩童奚蛇行蟻轉尙疲茶此豈可以容
馱馱連嶂合沓紅靺鞨亂峯巉峭青玻璃人從關
仝畫裏出天於羣玉山頭低陰厓倒突儼垂乳陽
竇尖削如遺桂嵌沙碎纈更斑駁戢戢散若牛羊
蹠我生愛石過顛米欲載蛾碌歸故畦端須買田
置林屋冥搜萬卷誇巖栖山僧誅茅得數畝抽林
巨竹畱新題回船青精飯已熟飽餐好逐寒山西

敬帆石歌

爲顧花田
先生賦

質如烟島排琅玕色如墨鴉堆髻鬟壺中九華未
足擬仇池一穴通躋攀千峰萬峰縮盈寸屹立不
動形孱顏清肌滑笏不受拭几席四照苔花殷石
帆幾幅疊巉峭石桅一道分爛熳宛如靴紋浪初
起半奩明鏡開秋山週遭上下渾一碧橫排巨舸
山中間水肥帆飽旗腳轉或欹或側波迴還石公
石姥相背坐中流歌笑何疎頑天翁好奇露狡獪
生此尤物驚塵寰黃牛白狗千重灘世上行路何
其艱收帆不住落帆少可憐人命如草菅何來此
石帆影間居然小泊黃蘆灣虎頭收拾歸都籃只
恐天風一縱凌潺湲

揚子江

晚雲鋪亂絮孤月墮寒烟歸鳥棲江樹吳簫亂估
船銅駝移洛日鐵騎沼吳年隔代興亡事臨風一
慨然

劍池再疊商丘公龍井茶韻

青壁攙天裂深竇鐵潭陷地穿高巖半窪深黑不
可視神悽骨冷心尤快靈湫感沸亘終古紺寒蒼
碧清而兼繩橋飛磴轆轤轉素綆覆絡僧廬檐五
丁好奇心不死巧斫山骨如排籤斧痕齒齒劖蒼
礦一泓碧玉中包緘金鳧玉雁霸王塚墓田若在
烟飄簾美人如烟鐘鼓散三千劍氣空埋嵐葬者

荒唐骨已朽穿者痴絕應遭砭干將神物豈受掘
白虎死守誰當探惜哉屬鏤不早殉致殲忠蓋張
凶讒泉枯石爛有客到凜凜石閭堆白鹽金精失
冶棲魂怖水犀長鬣如人髯恐有乖龍繞我足諸
公慎勿張雄談

舟次玉峯偶感傳是樓往事三疊前韻

北風巉峭落沙嶼南帆偈仄迴高巖馬鞍山色蘸
眼碧刻劃寒翠意最快當時長句我愛讀筆力韓
杜能相兼只今雜誦未忍釋痴如凍雀蹲寒檐具
區浩浩若奔馬玉峰戢戢如攢籤不愁兩手泝緝

沈一囊破錦親縫絨哲人萎矣典型謝空餘萬卷
堆湘簾千秋茫茫孰傳是精靈宵冥烟銷嵐鑄金
繡絲念未已蚨蝻乃欲橫相砭騎鯨大去返碧落
仙山樓閣歸重探憐才一念足不朽文章萬古爲
雪讒芥薑之性老愈辣肯以白酒堆甜鹽感公遺
事只嗽夔皴瘃兩手掀松髯詩成鈎棘不媿婿經
倉瑣事聊評談

丘南是汪堯峰先生著書處

山光塢影尙嶙峋遺築丘南野水濱草沒垣衣何
限感乞花場上弔詩人

先生自題所
居曰乞花場

舟行雜詩用商丘公韋菴閒興韻三首 選二

寒鐸聲沈鼓罷搗柁樓枕手靜無譁峭帆乍落烟
粘浪織雪纔消水唾花嶺外白雲天一握溪邊黃
葉路三叉吳江楓冷多時了指點寒山寺影斜
喘亟羸牛不受搗輜車爭渡但聞譁 錢唐江南岸皆
以牛車行水中 海
天一線迷帆影吳越千山送浪花曲岬晴泥香印
屐崩厓老樹影攢叉西興雲氣朝來斂小市茅檐
烟晝斜

白龍潭上廢寺

霜林倦倚一枝藤古廟斜陽塔數層時有神鴉來

會食絕無白足與然燈長廊靜院珠光隱漁市菰
村水氣澄鐵色空潭猶在否千年龍子喚難磨

青衣泉

石稜如劍光森森石乳點滴波沈沈陰厓玲瓏窻
突坼誰施斧鑿穿巖心講師昔年鼓鸞吹倒騎白
鳳遙登臨青衣化人獻花果雲踪晦靄難窺尋自
從靈扉一朝鑱空餘仙跡傳古今竭來山椒借瓢
飲風簾淅淅霜抽林神光夜發認何處一泓幽閟
窪而深丹經遺訣世莫曉香岩冷落卑層岑法華
魚肉我不羨腥腐濯盡橫青琴畏遭罰僂斂手避

洞門不敢輕敲簪

登鳳山頂望錢塘江

江濤如雷礮春擊寒天西老龜作長吟束縮如兒
唬絕頂凌蒼雲象外淒以迷俯視浮海蜃滅沒如
白霓盤躡據飛厓百丈窮鈎梯元精羅心胸蕩謫
雲霧齊風急吼鴟號鴻濛歡相攜一髮杳莫窺弱
水通合黎

靈隱寺

四面嵯峨翠掃空籃輿導我入幽叢孤亭匝地松
杉冷石笋連天洞壑通竹引香泉來佛屋風吹清

梵落雲中一條卽粟穿烟去去訪仙人長耳翁

龕山望海

雙闕峙海門昏烟亂蒼鶻南際無點青東瀛此疎
豁一氣連蓬壺形神俱超越犀船與鐵騎簸蕩在
空闊清時靖萑苻諸彞敢竊發蒼藤帝釋居珠宮
間貝闕回頭叫始皇遺跡空突兀拇窠及履痕千
年泐石骨江豚拜鯨浪舞嘯馮夷窟蓬萊此左股
崖嶠青欲活琅然起嘯聲娟娟映纖月

鏡湖放歌

我聞南湖三百里天晴湖面堆青瑤溉田一萬九

千頃芄芑黍麥兼嘉苗有功斯土馬太守祀典百
世胡能祧厥後四明有狂客詔賜一曲稽山椒千
官祖餞趣歸隱寵以宸翰光中朝會稽司馬日載
酒嘹唳玉管紛瓊簫劍南陸游此歸老卜廬湖畔
窮昏朝投荒萬里返故國風塵馳逐朱顏凋道士
莊前調白鶴柳姑廟後停蘭橈此湖自落放翁手
江山壯觀未寂寥西風陡峭鏡水裂曲港冰合寒
魚跳劇憐鏡水已非舊湖田侵蝕生蓬蒿白塔洋
前一掬耳蕩漾無復迴春潮今我來遊值歲暮一
輪皎月橫烟霄狂客不逢放翁死湖山勝地歸漁

樵與酣偶然作三弄羽衣玉立誰相招

晚遊吼山

日落樵風吹五兩鏡湖濺濺鳴細浪木蘭雙槳泝
迴波水態雲容樂清曠須臾已至吼山前鰲擲鯨
喙不可狀谷簾瓔珞勢交環飛棧唵岢屹相向孤
舟棹入無底壑其上巉巉插青嶂人行壑底與天
通水漱山根驚石漲撲人白蝙蝠共飛翻潑刺銀鱗
還擊撞神房阿閣現眼前博戲金仙爭跳盪客言
胚暉初分時五丁鑿鑿手親創高掌遠蹠渾生成
此語相傳不無妄當初越王採山石泅水淵淪煩

巧匠崖谷都畱斧鑿痕狀若甌甑陳脯醬我舟昨
過烏門山邪許聲喧崖萬丈其下轟然儼雷鳴其
上啁啾如呀吭石乳點滴滲旁溪鶯兒破殼酥流
盡千年穿穴有停時卽與曹山同變相犬亭鼻鼻
白雲中躡捷峰巒穿篠蕩山深路黑崖岍危步步
天風防跌蕩趙家陵寢隔烟蘿冬青樹老無樵唱
興亡舊事莫沾襟且歸畫舫傾新釀

鮑山

鮑山山色如睂綠螺黛挽烟青簇簇洞中聞有丫
髻童手把銅盃浥銀瀑金仙真誥落荒厓猛虎道

旁時攝伏五色肉芝供客啖駐景無勞更辟穀
來山下悄無人閒凭一杖桃枝竹不逢羽客佩方
符但見歸農駕短犢山中居人畱我住地鑪火煖
新芻熟我懶尋仙思采隱徑來就汝山齋宿

題戢山山下廢署

樟陰森半畝遙接萬松青月冷蓬萊閣雲迷越望
亭凍梅開石甃老鶴守寒廳內祀王龜齡先生不是陶貞白
何從餌茯苓

宿雲門寺

鈴語斷還續空山伴懶殘疎鐘烟外出沙月定光

寒犀笏開蓮藏花鬘疊翠巒楞伽詮妙契一宿寄
精蘭

娥江舟次讀商丘公近詩偶有所觸輒成斷

句雜用滄浪卷中韻十七首選四

四周山滑一溪清展卷綿津遠寄情烟際日乘黃
篋舫紅泉綠澗苦吟聲

失道蒙茸事亦奇盲僧笑問客何之巒岈怪石樵
人語日暮山空說虎時

崖欹壑冷長疎苔巖窠巍峩勢劈開不米不黃山

數點公然撥翠送青來

公有米不米
黃不黃之句

不斷登登伐石聲鳥門山外客閒行深潭無底碧
流滿石罅一泓宜晚晴

野泛

道士莊前尋賀老辨才閣裏訪蘭亭劇憐芳躅都
銷歇日暮鴨船雙槳停

菱溪道中

樹影村光遞淺深木蘭雙槳思難禁歸牛浮鼻纔
離岬宿鳥巢枝早近林下箸溪魚光膾玉堆梓霜
橘色搖金漁簑擬伴鷗尾去烟水茫茫未易尋

蠡山用商丘公丁卯橋韻

蕩舟餘不溪繫纜蠡山橋桑林日未晏山路行非
遙長松八九株疎響聆如潮劍水漱寒碧泠泠玉
一條陡壁嘯喧禽大壑來寒樵佳處茅可誅跌坐
娛昏朝攀登歷絕頂圭嶺雲迢迢鴻濛爲掉頭洪
厓倘見招古墓何人墳滅沒衣襦消賢奸悲逝水
慨嘆爲長謠

半月泉再疊前韻

誰剖古時月一半橫山橋月光化爲水清冷雲踪
遙晶瑩濯毛髮瑀琮應海潮飛龍蹴瓊雪噴珠射
千條三兩岩棲僧汲水兼採樵坡公不可作佳遊

踵宋朝欹仄東萊祠芳躅今迢迢題壁曹與劉吟
竟誰爲招古人跡已泯古人意未消大瓢更小杓
酌罷商聲謠

西栗樹

鬢髻西域樹枝柯拂石橋小雨潤藤索掎擊風蕭
蕭摳衣松逕滑拂面岩花飄根株互連絡蒼颯尤
矜驕芒鞋破塊北絡索橫相要初地焚辦香梵音
聆海潮晴曦射叢薄天宇清寥寥何當襍被來誅
茅依山椒

蔬食後甚飽有作

土酥甘脆佐朝餐白芥青菘滿食單也與何曾同
一飽鷄豚無味莫堆盤

塘西悼金介山呂山瀏

一聲欵乃日沈堤纔過苔溪又雪溪吹笛山陽寒
草綠詩人零落古塘西

草堂酒熟侍家大人作

入門寒筠青林端露殘雪拂拭衣上塵寒威倍凜
冽冬缸漉浮蛆晶晶瓦杯凸盤餐婦手操餽飮亦
芳潔藉以奉親娛形神頓超越小弟嬉前楹刺刺
語離別夕陽映松扉古梅枝馥醇盡此一日歡萬

事總蠓蟻泄泄父子間至樂忘言說

房中詩

嬌兒哀師繞案長文如翻水聲琅琅夜堂篝火攤
書讀吹落燈花紅簌簌小者玉頰好省字手持梨
栗能爾汝中男依兄坐短檠毛詩新讀一半生山
妻椎髻夜操作手弄諸雛共笑樂頻年踪跡隨天
涯賴汝黽勉能持家不爲楚相君勿哂與君相偕
鹿門隱

山雨乍霽由桃花澗歷天開岩觀禹碑望最
高峰慨然有出世之想

掬水浣山泥藤牀睡初覺空山一夜雨飛瀑千峰
落起來天宇清曉雲露斑駁澗水東西流噴珠滿
大壑宛轉如遊龍天矯不受縛首尾一鼓盪鱗爪
恣挐攫森森疊浪巖皴匏瘦如削起伏生波瀾圓
穹大包絡破碎瓊瑤瑛跳擲狙獾攫趺坐作水觀
清響聆竽籥喧極靜意俱冥心契寥廓曳杖行前
岡適與山僧約將窮最高峰搜奇出齷齪徑路共
猿爭上下似鳧躍崖花罨葛衣茵露濕芒屨枯藤
立伶俜倦蝶穿畧徇搖搖鳳折膝戢戢牛礪角攀
躋高送眼崎嶇危著腳山果團青紅酸甜漸可剝

朋牽寄生草蔓引攝生藥幽巖從天開化工巧鑿
鑿陰磴竄猩鼯陽竇捲亂籜石軒久傾頽空壁就
捫摸禹碑古篆奇鸞飄還鳳泊如從岫嶠過探奇
自南嶽松風迴杖底人語出林薄絕頂望茅茨天
風隔蓬弱梵唄音琅琅木魚間金鐸振衣擬往從
十步三四卻開山思法度團瓢此棲托我生實鈍
根踪跡判塵濁僧寮一月住飲啄類孤鶴何當將
家來鑿坏飽葵藿

西溪大石

斜日淡長林十丈蘿衣褂松風拂樹來歲月迅以

邁誰整羲和鞭秋中節已屆窅然一片石影落巨
浸外老魚跂足捫天女垂頭睡青電插紅雲一夜
精靈會鬚髻拂綠苔摩挲發長噫數聲菱唱搖百
朶蓮花曬鏡水裂琉璃靈根浸澎湃何年出泥沙
風濤恣洗汰道人坐懸厓枕此漱寒瀨玲瓏勢欲
飛嵌空險而大象脰草芊芊猿吭星噦噦終焉從
汝遊斷嶼劈蒼蟹

焦山僧葺山志初成索予題句因書卷尾

三山一氣青蜿蜒峭帆擘破空江烟數聲漁唱隔
晴碧夕陽杳森聞扣舷菜翁

花田太史

逸興何軒軒振

衣直上秋樹顛漫山紅葉絡碎錦青黃雜糅波中
天蝸牛廬中草芊綿坐聽江水鳴濺濺我擬將家
傍巖住焦公祠畔容醉眠雷轟古石畱厓邊八行
遺墨當時鐫馬鳳笙今何處所女郎佳話千秋傳
石上有鳳
笙題名前塵影事空憂煎不到此山已六年寺門
行過霞淚落天香主人今已仙癸酉秋侍
先君遊此茲遊悵惘
空迴旋名山一日難延緣牽船欲別不能別一江
新月流娟娟

芽村

絡緯嗥殘夜有聲野航浮泛不勝情葦燈竹斲村

童語潮落沙灘見蟹行

打麥詞

小麥雙歧如燕尾大麥叢芒如馬鬣黃雲遍野麥
齊腰暖風四月飛黃蝶鎌刀霍霍割上場連枷齊
打堆連牆紛紛落磴白於雪飽喫今年餅餌香

采桑詞

頭眠蠶起碎切桑二眠食葉聲滿房三眠將老食
轉急青裙犯曉提筠筐桑梯高高桑鈎短女桑葉
盡樓桑滿蠶絲百箔樹頭鳴催買桃漿賽蠶館

射鴨詞

家鳧拍拍雙翅重野鴨花毛似花鳳泛浦行沙唼
喋遊水鶴孤翹驚不動鳧羣肥澤鶴癯然脰長脰
短全其天桃弓放弦箭撒響一時決起衝雲烟

采茶詞

一旗一槍芽尙小兩旗一槍芽已老官符未下催
頭綱穀雨登山猶少少鶴園名品茶最多鷄藪不
如虎膝窠野花山葉簪頭鬢結伴采茶齊踏歌

渡江疊集宮丈恕堂韻

泛泛黃篋舫軀幹苦曲俛三老挽桿索呵笑無少
快暴風忽震動圓穹狹而褊我身如蠹螺簸蕩聽

驅遣嚼嚼浮沫煎塵垢不可洗地踔無厓垠天跳
失關鍵斫斷白蛟脊斧痕遞深淺馮夸呼嘯來猙
獰踏飛輦怪面森可怖奇形見亦鮮乖龍舞澎湃
驍猛四足跣安得施大手屠割上鼎鬻浪絲如匹
練砉然乍裁剪又如萬馬騰邊沙齧枯葍怪聲與
細響灑潏劣以謏吳牛喘未定勉強就曲鞮寢訛
雖有態疲革力難展三山一水望雲中吠仙犬焦
先笑向我此客顏小忍揮手長謝之汝豈神仙選
木鑽學還丹爪廬昧墳典避詔不避名苦受紅塵
胃括囊空守口歲月恣盤衍噉噉何地無趨避計

亦舛何如狎風波游行面無覩俄傾礮車停少焉
亂雲卷碧翁著斑斕噓氣化災沴行子甫載途耕
氓已出畝沽酒鐵甕城引觴賀且勉栩栩赴黑甜
如塗塞續冕春波搖淨綠鞞紋浪平充榜人唱銅
斗夜靜參旗轉翔步涉廣庭曠蕩謝屯蹇柁樓罷
鳴鉦天風手爲舉回視無底壑失足今知免

小忽雷歌

南部新書載唐韓晉公滉入蜀伐奇樹堅緻如
紫石匠曰爲胡琴槽他木不能並遂爲兩胡琴
名大小忽雷後獻德皇樂府雜錄云文宗朝兩

忽雷猶在內庫內人鄭中丞特善之訓注之亂
始落民間孔博士東塘得之燕市蓋其小者名
爲二絃琵琶

蜀中嘉樹高崔嵬肌理堅緻如瓊瑰誰人伐樹競
鏤刻斲作大小雙忽雷檀槽飴呀鳳凰齧曲項冰
環挂雙索勞嘈咽切響寥廓馬上提持手親作子
絃嘹唳角聲停鼓此權當伐蜀樂五絲彩線覆龍
首忽入昭陽伴紅袖風生鳳撥花催柳鄭娘曲曲
春風手傳頭轉換聽未終白日青天雷電走含元
殿前夜月寒小吏池頭把釣竿裹來半段蒲萄錦

舊事淒涼說女官露盤淚瀉如鉛水碧漢茫茫非
一軌中原瀕洞久風塵此物人間誰料理小忽雷
存大者散汾水年年叫秋雁半彎邏沙一堆塵博
古何從辨真贋金絲軫斷濩索偏可憐零落將千
年有客相訪來幽燕買得不惜青銅錢摩挲一似
琴無絃一彈再鼓何人焉唐家秘器已莫彈吁嗟
雅樂誰人傳

袁浦贈佟振北

清江地界長淮南花事十分無二三濃春漸去綠
陰滿堤柳減翠天揉藍軟泥漉漉浣袍袴空街躑

躑行何堪愛君林館淨如拭藤牀跂腳窮幽探竹

梢鬢鬢鬢敗絮罽頭點綴縈空嵐主人好客竟投

轄况逢舊雨朋盍簪三杯放腳春酣酣鮑照又沈

約天張雄談野夫倒牀正寢鼾自笑懶若頭眠蠶

誰何吟聲殷深屋名章秀句飛相參披衣屬和疲

手腕楚漢格鬪麈章邯可惜卯君隔名埭圖南脫復

在坐尤顛憇吾儕聚會正匪易歸航悵惓搖晴潭

爲語君家狂阮籍他時相訪提筠籃

淮陰詠古德州田公座上分賦

袁術

公路浦前白日昏千重駭浪猶奔騰袁曹昔時爭
戰地秋原尙作黃雲屯兄弟閱牆事堪嘆術也讐
紹翻結瓚謬算適足羞先公尙欲覘顏應圖讖里
謠誰記當塗高僭號不聞閭象諫符命之說誠荒
唐可憐蠻觸大夜郎江淮凍飢士卒死宮中日夜
爲荒亡蛾着皓齒競漁獵馮家小女悲馮方潛山
之敗所自致江亭犇竄如亡羊堆牀十斛僅麥屑
一勺入口無蜜漿當時割據意何取離離滿目悲
禾黍我來袁浦爲弔古老龍晝眠蛟夜舞鯨波蝕
盡戰場土

陳登

北風蹶起聲雷礮高堰突兀如壞牆犇騰澎湃險
可怖當時誰挽狂瀾狂伏波將軍守此土倡議築
堰安淮疆洪濤噩浪一束縛安流郡縣無披猖往
者孫曹正格鬪廣陵重鎮非尋常獅兒屯兵列江
許如雲戰艦排兩廂元龍豪氣猛於虎東衝西突
勢莫當軍書旁午不遑息尙能底績爲河防偉人
所至有異績千載競頌陳公塘洪澤橋南缺廟祀
一間破屋臨斜陽

蕭望之

丞相門前甲光薄近前挾刃還露索吏人拘儒如
拘囚仲翁俛首蕭生羞倉頭廬兒競簇擁道旁相
逢笑卑冗士各有志非所求寧甘小苑東門侯愛
汝一生最强項不肯阿諛附丞相晚年秉政來彤
墀可憐霜華已上髭束身法網日羅織朱游一呼
仰藥亟與人家國徒憂煎功成不去死吏前曷不
歸種杜陵田

枚乘

七國反秦宗社誰其諫之枚乘者三公誅謝天下
老王驕蹇足悲咤上書不聽何煩寃去吳一旦遊

梁園梁孝園中賓客多梁王禮士來巖阿一夜雪
花催賦草娶來燕玉堪煖老小妻生子髮垂肩能
操弱翰乃公前
蒲輪歷碌安車高枚生老骨埋蓬蒿黃口外舍竄
草莽伏闕上書來枚臯尙書給札平樂館曼倩與
君稱上選狗馬蹙鞠爲鋪張祿祠一篇推擅場媒
黷貴幸各有故安用尊官慕嚴助男兒經術多擠
排何妨奏賦爲俳諧

馬宮

渭陵冢中三日火傅后丁姬相向坐石墻斑斑繡

土花寶衣繡恰猶纏裹當時誰不知莽奸百人崩
壓心爲酸追誅前朝議禮者羣公阿指來臺端定
陶啣悲九原下長嗟乃爾忠臣寡君亦當時倡議
人趨避不欲危其身師丹薦君行誼潔何至委蛇
虧大節假皇南臺僞讓時覲顏又作青宮師乃知
世惟通儒能美新君不見東海馬游卿

孟喜

從田生受周易生且死枕喜膝此事當時或有之
梁丘詆訐何其愚趙賓持論縱巧慧易飾易文義
亦贅何如終守王孫言能自立家精且崑師門授

受互欺詭當時盛漢已如此噫嘻卿也有書不授
喜至今諸儒議其子曲臺署長年老矣

嚴彭祖

夏侯勝語可鄙謂明經取青紫當時劉歆亦名儒
利祿何爲挂牙齒美哉下伍嚴公子身不爲相能
爲儒委蛇從俗何爲乎抱遺經眚孟死眚孟死二
賢作嚴彭祖顏安樂

書德州田公黔南山水詩後十五首

選十二

枕榔杖底夕陽斜
犵狔村前鳥跡賒
想像題詩鸚鵡寺
藤梢橘刺苦斜搗

嶺上花鬢疊似螺紅酣白糝一山窩八騶初入黔
南路白水巖前好放歌

鐵索橋南感廢興粘天拔地勢峻增瀾滄江上山
如錦小李將軍畫不能

蘆笙夔鼓鬧城闌熨女番童翠鬪新跳月搖鈴好
風景奢香驛裏看迎春

簪花傅粉亦何堪逐客佯狂滇水南誰向碧曉雞
麓裏手澆蠻酪弔升菴

讒言貝錦苦排擠一代知音是晉溪箐黑雲黃飛
瘴雨陽明祠外草萋萋

綠如么鳳黑鴉軍如此江山駭夙聞白馬渡前延
佇立一叢鸚鵡戲紅雲

藤芒鬼帶刺人衣笋迸龍奴竹幾圍譜出辰沅風
土志如拳黑蝶傍巖飛

侵曉郵籤紀路程槐花驛裏病蟬聲愛他搖叟聲
如磬者卜河邊相並行

迷離踪影立高峰杖策西行路幾重萬古山川笑
行腳神仙癡絕是三丰

扈業週遭湖水流銀魚香味敵槎頭添錢買得十
千尾可似白泔紅乙不

村沽容易醉顏酡
呼風且放歌安得
攫身去
河泐仙方釀酒問
崔婆

秋日廣陵雜興和
商丘公八首

選二

遙山幾點如潑墨
螺髻碧玉交相圍
定攜蓑笠造
絕頂孤鶴傲岍誰
能鞿

滄浪亭子堆蒼苔
秋花零落千叢開
碕西草堂昨夜雨
更有何人問菊來

前題和宋山言

選二

惡木鄰園已盡芟
籠烟露竹映松杉
抽身獨背琅玕坐
古渡橋頭數落帆

平山原是詩人地
古墓荒烟路慘悽
憶向春泥澆
濁酒山泉嗚咽蜀
岡西

六境圖

有序

六境圖爲商丘公
生平宦遊之地其
詳見公集中烏目
山人王翬繪圖紀
勝庚辰冬日謁公
於揚州官舍出圖
相示謹和六章

洗墨池

髯公在黃州五年
謝朝請閒客閒處
所渴毫日馳騁

坡詩人言此閒
客宜置閒處所

洗墨劄爲池墨華
沾藻荇至今吮墨

蛙脣黑色逾靚

池蛙食墨口黑
載公筠廊雜記

如何遺跡湮蕪穢
同督

井偉人初判郡晏坐樂清景前塵與影事一笑忽
記省訪古坡里坊鑿池可容艇獨木駕爲橋披拂
淪漣影雪堂旣幽敞竹樓亦高整後楹羅簡編前
庭植文杏合祀宋名賢作記相與永髯公如神來
植杖定細領昔遊曾幾時卅年彈指頃

忘歸巖

虔州山水邦所至足登眺千峰儼玉槩一水如珠
抱茲巖尤瓌奇岡形莽奔峭神工巧爐鞴造化蓄
靈輿得名訝何年創自姚江老凭高豁遠目雙江
流浩浩憶公弭節時題詩上烟嶠振策塵外遊洞

壑窮搜討飛觴偕隱君僧伽爲前導

彭處士躬菴
魏處士叔子落

葉滿衣裙雲深不可掃尋寺與看山乘興從吾好
酌酒弔陽明後先實同調螺亭一點青城郭烟嵐
繞披圖我忘歸臥遊領其妙

潞亭

東華十丈塵蹴踏沈我衣閒來潞河上洗眼見釣
磯風檣雁齒列撾鼓當斜暉憶公拄笏來觀察臨
近畿訪古葺小亭嘯詠都忘歸鷗鷺繞檻前撫景
且息機高吟醒夢寐振筆紛珠璣四圍雪色壁深
夜彈朱徽喧囂忽夷曠令人思翠微森森鮑丘水

寒碧遙相依盤山在東郊
悵望雲樹稀晴翠落檐
際對之色欲飛至今通
潞津突兀畱清輝

鵲華秋色堂

鵲華好山色飄渺梳烟
鬟合沓雲氣繞碧玉相
縈環正如兩美人對照
蛾眉彎吳興有圖畫妙
手追荆關劈窠顏中堂
秋色紛隣煊放衙紫翠
曉捲簾紅樹殷停車不
出戶晏坐看秋山星軺
遽南發未得窮躋攀半
年住齊州悵悼別孱顏
韋菴清夢醒幽意兩山
間

煙江疊嶂堂

開府洪州時政成最清曠
間爲北蘭遊寄興臨霞
上萬朶青芙蓉烟江羅
疊嶂畫本落眼前真宰
勞意匠晉卿繪佳圖結
構此倣樣王蘇不可作
築堂

聊俯仰匣中趙沈筆補景足相抗

晉卿烟江疊嶂圖東坡題詩真迹不可得公有

趙承旨書蘇詩沈啟南文衡山補圖卷

清光好摹寫佳處倍神王曲曲棟

花坪名自邵叟創

邵君子湘

一勺尤甘芬澹雪難爲狀

楮袍與筇笠僧扶方竹杖
賓從皆雅流同時發郢
唱東湖諸父老思公還
悵望何時節督來空堂
再相訪

滄浪亭

平江富烟霞名勝詎云乏劇憐蘇長史遺蹟日摧
拉南園幽曠地一水亂鶩鴨舊有滄浪亭荒廢失
修葺復古藉巨公捐貲施版鍤當時太廟災封事
最淹洽徙謫來中吳歲月熟羊胛顛蹶了一生何
異走夔峽身後萬口傳生前百寮壓數椽妥吟覓
欄楹未褊狹春風三月來流鶯唬恰恰酌酒弔齋
郎精靈對花呷繞亭足流連不須泛苔雪

商丘公賑饑興化口占奉懷三首

選二

三閭祠後白波圍楚將廟前紅樹稀怪底墟烟寥
落甚鄉人半化冷鴻飛

滄浪亭上濯清流又向滄浪暫艤舟

昭陽有滄浪亭

難訪宗

生

方城先生

棲隱處半間茅屋百花洲

玉帶生歌

端溪下巖生所家萬古波濤爲洗漱馬肝龍輔難
比擬看子羅紋瞳已後金聲玉質凝青膏夜半神
光露蒼秀自從丞相署墨賓聲價連城未輕覲景
炎遺事各酸辛倔强兵間稱耐久磨盾草檄憤填
膺墨汁淋漓爪痕透堪嗟碧血冷萇弘正氣歌終
歸列宿西臺哭罷故人亡生也倉皇落誰手鐵厓
老子文謝儔七客寮中斲解后錫汝嘉名位置殊

笛管琴樽分左右張生振筆爲作歌鐵面花鑲工
刻鏤巧偷豪奪五百年曾有何人寶珉琇流傳忽
遇商丘公異錦爛編勤裹覆晴牕潑墨重摩挲一
泓觸手風瀾縐煌煌大篇和張憲五色雲霞紛雜
糅噫嘻此生初事文信公四野兵戈苦爭鬪再事
抱遺楊會稽革除之際莽馳驟今歸中丞書畫船
文明有象天默佑所遇最後乃大亨神物由來重
授受信公之銘鐵厓志合諸公詩三不朽利翰奇
煤盡策勲作歌起舞爲生壽

海陵舟次喜晤宋山言孝廉

商丘宋子天人姿等身著作多瓌奇顧生俠篋中
把君作蛟龍紙上纏躩踞別裁僞體有真解羣兒
剽販何其愚文章嗜好等膠漆雖未覲面心相知
前年偶作吳閶客小滄浪畔閒遨嬉學詩圖中見
君貌犀顛虎顛頤生髭綿津夫子正襟坐君也執
卷掀雙眉碧梧翠竹淨於拭禹慎王石谷合作窮毫
釐率題斷句附楮尾夜船趣向金焦移吾曹聚會
頗不易就中作合非人爲竭來淮南十月尾中丞
移節荒江濬頻年賑饑過澤國發粟大療饑鴻饑
童叟萬億戴明德羅拜感激翻涕洟撥觸文書便

吟寫門生絳帳談聲詩褰帷一笑偉人出領間秀
色尤麗崎光芒燭天更韜晦自顧但覺神氣卑夫
子一代幹元化經倉書苑芟蕪靡陶鑄餘子有成
法籍又競奉韓門師鯁生苦爲聲律縛安知大雅
千秋期叢殘詩卷不收拾空對庭樹吟寒鴟乞君
過庭說詩暇爲我洗刷求癡瘕此間無地足登眺
寒濤匝岼烟雲漸安定祠荒雲樹冷小西湖涸亭
臺欹北郭數椽讀書地書堂冷浸青玻璃沅所居讀書之地曰
清響園頻以茲里居苦偏仄風塵滿目愁衣淄也擬
毀於水將家學聱叟不爾泛宅師天隨愛君西陂好風景

芟梁綠淨烟差差放鴨亭南緯蕭北朱荷千頃搖
漣漪待提笈簪會相訪佳處容我添茅茨

齋居

一夜白皚皚庭樹變瑤草縛帚煩蒼頭竹屋幾回
掃單居繼輞水布被起常早適興開故篋翻按理
文藁塵埋字半晦蟲蝕義難曉吟哦如哀猿聲使
鄰舍惱吾生類蝸牛粘壁就枯槁那能學黃鶴日
日矜觜爪終朝但癡坐懷抱幾時好憂來廢書嘆
朱顏可常保

草堂疊石初成贈李老

北郭皆水鄉樓臺漾空碧那知春雨中青山長大
澤一峰臥黃牛一峰起太白不信三徑深而有五
丁劈百簣覆何多選石爲之幘亭午擁歸雲樹陰
受對奕從來造化功大小無定格爽氣撲一拳巨
靈盪餘魄把酒送斜陽小牕日易夕江北有名山
得一以當百

同舍弟甸洋坐花嶼

苔衣人跡破前林曳蒼篠疎籬界夕陽暝烟惑歸
鳥陂水秋轉綠斜岡晚可眺粗虫號草間微風漾
斷蓼簣谷闕遙浦濯影鷓鴣小秋荷亦離披紅綃

失斷沼水茄白銀色拉雜碧溪繞飢鶴唳層雲清
響覺孤矯吐語驚流輩寄興臨霞表危棧同吟詠
小天色清森快傾婪尾杯俗塵詎能擾

新堂種竹用石湖盤龍驛韻

斷雲耿秋漢雨腳已西沒涼風透竹軒空翠正突
兀冥然把卷坐殘蟬更淒咽時序日已移脫葉舞
木末昏烟亂前岡飢鶴嘯林樾詩人悲老去髡首
愁欲絕浮查不可涉石磴苔衣滑河傾星吐芒冷
露滴華髮忘饑理古操有口付石闕垂頭伴此君
形神頓超忽

小至日登蔣山晚憩靈谷寺用李北海荆門

關韻

癡龍盤結氣悠悠振鬣豎尾騎五州蜿蜒跂跂有
萬曲紫鱗灑空排鐵鏃千年王氣已銷除攀髯尚
伴軒轅宿隧道平蕪亂草生古松數株麋鹿鳴金
牀玉几盲風起平臺不斷御溝水白頭宮監語支
離開門款客荒陵裏碧瓦凋殘冷炊烟糴谿雉隴
羅平田行人近前面顏熱難辨橋山一真穴翁仲
雲深蔓草寒橐駝背腫象齒折晚出紅牆陟亂山
塔鈴風寒僧掩關聖水寺前靈谷路八功德水移

來處空林葉響琵琶聲伎倆狡獪人仙去昔時藩
衛帝王家今日頽敗荒山涯

觀音巖望雪四疊前韻

空山雨雪清悠悠江螺亘天如大州絕壁崖柴形
詰曲苔衣石髮森斷鏃娑羅樹老劈壞肌荒荒只
就癡雲宿碎珠滾空玉屑生老鼉縮項窮猿鳴行
人踏雪拂衣起轉過峯腰憩古水毘盧樓閣聳華
巖題詩深坐佛燈裏雪濤拍拍寒磯烟江尾橫遮
一楞田古洞週遭地肺熱斷厓頑石誰穿穴聖僧
寂坐雙趺垂石鼎霜斂一腳折橫披鶴氅來登山

泉翁水若墨妙畱天關臨霞欲訪攝山路七年曾此
幽尋處香泥滑滑雪蓋頭恨不身隨飛鳥去角里
韻事看浮家曰歸不歸戀水涯

新洲看月六疊前韻時有故鄉僧話石梁華
頂之勝

老竈種類何謬悠拜風力餒居沙州我來泊舟新
河曲銀海動搖冷峰鏃一從眼底光乍明頓化胸
中物盡宿經聲妙好林端生撞鐘伐鼓相和鳴默
然僧呪薄伽起起迎行人吸江水仙佛時產魚鳧
鄉者臘多年淡竇裏僧言曾踏天台烟懸厓手種

仙人田石梁倒空丹砂熱阿羅漢行鍾乳穴腰包
假宿黃面嗔猛虎喉痒紫文折祖堂國清隔萬山
雪沒跌深未放關耳聽塔鈴辨歸路琉璃遍體生
霞處何年於越恣搜尋夢化一條雪練去莫老井
竈常戀家芒鞋穿雲未有涯

江左十五子詩選卷十二

江左十五子詩選卷十三目次

商丘宋

犖牧仲選

毗陵邵長蘅子湘訂

商丘宋

至山言校

王圖炳

春日用香山郡齋暇日詩韻

詠史八首

和昌黎秋懷詩原韻十一首

選八

題董文敏真跡後

鸚鵡

夜遊虎丘

入郭二首

楓橋舟次

鴛湖夜泊

三高祠

詠雪用廬陵潁州雪中會客韻

過黃耳墓讀袁景文詩

江上三首

雜詩十首 選八

遊仙三首 選二

遊秦望山莊用少陵遊何氏山林詩原韻

十首 選五 渡江二首

秋夜宿燕子磯明月橫空江天一色徙倚

篷牕不復成寐偶憶東坡夜起登合江

樓高吟子美四更山吐月殘夜水明樓

句得詩五首爾時意境至今猶可想見

因援筆和之仍以殘夜水明樓為韻

平原村

顧林亭

白燕菴

題畫鷹

鶴坡精舍

東谷

竹西草堂

秋水軒

玉鉤斜

邗溝旅夜讀綿津先生詩集賦呈五絕句

知音春光眞愛我乍暝亦輕便乍寒亦帖妥遮莫
及春遊猿鶴輒許可

詠史八首

大言恥詹詹烈士羞齷齷弧矢志四方釣遊懷丘
壑知幾其如神雲鴻翔寥廓陸賈一書生高義何
磊落南海尊尉陀鷹鷄姿拏攫賈也慷慨行談笑
三章約玩之股掌上狂波翦鯨鱣杯酒足解紛黃
金滿歸橐如何戶牖侯遇事輒怖愕交驩得絳侯
良言眞上藥諸呂竟何成如風捲寒穽不願析人
圭不願僭人爵好時有良田琴劍堪寄託無久恩

公爲橐金散亦樂

洙泗無煖席齊梁無停軌吾道大可爲斯人詎可
避閉戶與纓冠出處須易地貞元有韓公讀書尚
其志唐士太披猖淫靡沿六季獨自抱遺經卓哉
不朽事舐排二氏言周情兼孔思鳳躍鈞韶鳴氣
象庶幾似當其未遇時皇皇出載贄佛骨尚欲燒
鱷魚尚欲制豈其百鍊剛繞指頓柔脆三上宰相
書誰識艱難意汝曹不自量嗤點何容易撼樹任
蚍蜉當轍笑螳臂

文人陋史遷乃在慕貨殖刁間知棄取曹邴尚儉

嗇馬醫羨擊鍾灑削豔鼎食簞瓢復何人因之貽
口實我懷作者時乃知作者識侏儒樂果腹東方
憂菜色緩急恃季心功名看卜式莫漫論錢愚且
商尋尺直

博物推張華其後有劉杳丘索恣畋漁汲冢事幽
討所見所傳聞一一窮微渺牛象既有徵荷囊亦
有考長頸識毗騫楮酒揚文藻坐令任沈行訪問
輒傾倒古人於六藝未有了了爾雅箋蟲魚國
風志花鳥一物不知名愧恥安足道薄俗尚浮夸
稗販爲機巧韓馬實中乾紀雞乃虛憍誤點金根

車詎辨瑯琊稻何獨一崔協園譏識字少

言乃心之聲無取僞而辯談天炙轂輾轉盼何曾
踐我讀閒居賦字字涉墳典浮雲看富貴泥塗眎
軒冕築室洛水湄池梁通宛轉微雨報新晴板輿
御翠巘春稅足代耕灌園足養膳觀其作賦時頗
以理自遣如何拜賈塵拙者亦不免周任陳力言
晚節動乖舛始知槃澗中未易輕游行淵明千載
人庶幾知舒卷所以歸來辭別自出手眼

高談驚四筵莫如夜說虎說虎尚倉皇何況挽強
弩猿臂李將軍射虎如磔鼠虎嘯神逾王虎縛勇

猶賈昨夜北風號南山虎
俱俱單騎出灞陵黃塵
捲宿莽腥毛忽蔽天
颯沓飛寒雨道傍怪石蹲
一箭俄飲羽豈知夜半歸
亭尉立碎語時至虎無威
時去尉能侮猛虎寧可逢
醉尉那可遇

世人慕桃源恍如仰碧落
或疑爲神仙或迷悔尋
索尋者固大愚居者亦大
錯天地有正義斯民安
土著桃源本王土歲歲事
耕作衣食各經營婚嫁
各酬酢阡陌通往來雞犬
互擊搏一一如外人何
乃傲洞壑寅緣入其源便
與源中約秋熟供王稅
春蠶同民瘼曆象可占時
版籍可栖託久脫祖龍

危安事種桃樂漁人竟不言
至今勞穿鑿

得道須慧業立行戒腥羶
那有鍊黃白可以致神
仙神仙何從始云是李耳
傳道遇關令尹其言頗
戔戔狡獪青羊肆嬉戲徐
甲錢從紅復入黑爐鼎
沸丹鉛君臣與嬰姪枉用
別媿妍後人好附會李
耳豈其然徒令文成輩哆
口談延年滄海測深淺
蓬萊思寅緣蠶以絲自縛
膏以明自煎我欲砭其
愚大道在睫前風牀展周
易進退有真詮不言求
上藥不言昇青天

和昌黎秋懷詩原韻十一首

選八

江右詩選卷十三
四
秋風拂中田我黍亦疑疑四壁有寒蛩唧唧何時
已兼之落葉聲一洗箏琶耳瞪目送鴻飛欹枕看
雲起跂脚北牕下自謂斜川似蠻觸不須爭蕉鹿
亦難恃圓蓋無私恩義鞭無停軌浮生好是閒濁
醪聊自喜

秋氣例高嚴無復春靡曼菊英資晨餐菰米供晚
飯田家方築場滿遂豚蹄願作力腰霜鎌婦子相
勞勸夕荷穰稔歸倉箱浩千萬珠玉實天庾先將
辛苦獻殊異涉江子芙蓉落清怨

物性有炎熱乘勢始憑陵秋風盡力格瑟縮憐凍
蠅盈虛屬時序世人枉愛憎涼夜玉宇淨片雲削
冰稜明月落空潭三星浸寒罽叩舷唱小海庶幾
我猶能

風勁阜雕輕露涼黃鶴警遙昔動如年丁丁漏箭
永侵曉披我衣棉裘寒已猛枯桐倚井牀金瓶汲
素縷闌闌始塵喧壑斷亦微幸笑我百無營朝陽
射簾影

避世元真子烟波逐清景倚艦雲依依入室月
囧八月九月時挂席若萍梗鶴髮對斜暉乾坤足
遊騁苔雪可浮家不效鑑湖請

曉霜草色頽夜雨螢光暗所以悲哉秋常令楚客
憾壯夫恥雕蟲八極一俯瞰臭腐化神奇絢爛出
平淡寧爲和璧別勿作齊竽濫松粒與薜華力爭
只久暫駭馬不須鞭危檣不可纜楯鼻古墨磨夜
鐙軍書勘笑彼井底蛙器小守甌甌

昔余好遊覽躍馬度桑乾秋水鳴漈漈清若戛琅
玕西山擁馬首渺渺碧烟團千門復萬戶佳麗數
長安長安逢俠少款語激情瀾約我出長楸柘弓
飛銅丸薄莫問歸路明月滿征鞍

戲招武夸君高唱人間好我家山水鄉遊行須及

早秣田况有秋一醉真可保微雨東南來四野潤
枯槁落帽想龍山不夢邯鄲道

題董文敏真跡後

右軍筆法絕世無直欲壓倒鍾司徒誰其繼者褚
與虞顏柳巨手相追摹顛張醉素奇有餘詭遇不
復範馳驅宋時諸公好華腴睥睨晉唐羞步趨豈
知微瑕生美瑜何異氣索見大巫後來書苑日荒
蕪秋蛇春蚓競挪揄見說雲間體格疎但恨不識
董尚書憶昔承平開石渠尚書文藻挾天衢錦囊
玉軸紛縈紆一一辨別權錙銖鼠鬣蠶繭出玉除

詔寫二典及三謨要取誠懸一諫愚不羨元和新
樣殊陳之斧戾春華敷來禽青李見規模世間詎
少周越奴亦有羞澀羊氏姝一時斂手復囁嚅鐵
限片紙爭覬覦麥光玉板如雪膚分揮九十六驪
珠百年時事已模糊硬黃不比丹青渝法寶流傳
重欷歔奚翅商璉夏六瑚我生好事在編蒲藝林
學海恣畋漁博覽曾探惠子車深藏亦有虎頭廚
風牀展卷極清娛想見尚書運腕初弩張劍拔勢
何如鶴舞鴻飛體自舒昔賢一技必勤劬退筆如
山墨未枯不然嘲笑等鴉塗天闕剡藤何爲乎今

我懷古獨踟躕

鸚鵡

文采擅江東隴山短夢通有時尋稻粒無計脫條
籠侵曉梳翎慣當牕學語工聰明眞誤汝天際看
冥鴻

夜遊虎丘

曉山疑靚粧夜山疑澹抹曉遊躡輕烟夜遊踏佳
月我行值春風挂席胥江闊日莫停蓀橈疎星閃
林樾晚景旣蕭閒野興更勃發山徑寂無人寒濤
起松栝歷磴數歸鴉捫藤驚栖鶻隱隱叩精廬卽

事慕禪悅粥鼓漸消沈龕火時明滅是夜月如霜
玉盤明可掇石上足徜徉幽光淨巾韞坐嘯且行
吟簾影細于髮松風入我耳免被笙歌聒選步得
劍池乳竇鳴汨汨誰能測深淺應是源頭活若有
毒龍潛恍訝干將拔其上飛峭壁天半昏曉割路
險無階梯樹老無荏蕕我愛同米顛欲拜具袍笏
其後俯平田溝塍自行列崑膠認微茫海虞見髣
髴決背盪心胸萬象逾超忽因茲感苧蘿何處問
吳越寂寞館娃宮絃筦倍嗚咽朝爲麋鹿墟夕爲
狐兔窟我勸始言歸仰眎斗柄揭少懷五嶽遊此

山棄毫末那知面目真夜靜始奇絕揮手謝山靈
勝情頗自伐年年裘屐恥努力爲汝雪

入郭二首

入郭樵風便空舫泊淺沙秋雲雜帆影寒雀啄蘆
花夢破驚雙鬢詩成愧八叉滄浪容我道招隱莫
嫌賒

千古華亭谷聲名二俊畱砧多催落木潮急亂眠
鷗人散孤城角烟生近水樓一樽遙酌罷鶴唳起
前洲

楓橋舟次

前年曾宿楓橋下澹蕩春風漁火夜亂挽垂楊綰
畫橈吳孃低唱雨瀟瀟重來且醉楓橋酒秋江無
復青青柳惟有寒山夜半鐘依然飄到客船中

鴛湖夜泊

迢遞鴛湖路孤村獨夜船鴈依估客火星沒戍樓
烟身世飄飄燕江天跼跼鳶菊花柔櫓外鄉思夢
頻牽

三高祠

檣烏語天風吹過松陵路松陵何所見落霞與孤
鶩湖峰七十二鬢鬢出烟霧此地可浮家便欲牽

船住昔賢非無謂先我辦釣具一感蒹蘆秋再感
杞菊賦步兵困冷曹州辟失權趣歸去固其宜丘
壑履我素煌煌范大夫定霸輒自許時非季鷹時
遇異魯望遇如何百戰雄翻作五湖慕英雄踪跡
奇處女幻脫兔至今懷高義層霄不可溯張陸幸
成名譬彼蠅驥附我來拜荒祠日落垂虹渡不獨
薦溪蘋思把黃金鑄

詠雪用廬陵潁州雪中會客韻

寒梅萬樹斂凍萼朔風昨夜號林薄朝來六花眩
銀海揜日韜霞勢已作應知玉龍白戰歸敗鱗殘

甲滿城郭高巖欲使湯谷凝空靈未許洪爐爍野
外年年瑞葉飛牕前無數春蟲落短衣匹馬是平
生雄心猶復思于貉還愁狐兔蹤跡深獵騎無處
恣拏攫爪影矜嶢沙上鴻饑鳴瑟縮紇干雀穆滿
能爲黃竹遊我欲從之濕芒屨恍然身到蕊珠宮
琪草瑤花皆可樂眇眇下界等毫釐使我靈府朝
朝淪君不見天山十丈積秦時如席如篴舞沙漠
又不見蔡州一夜鵝鴨池六軍縞素揮矛槊何似
鄒枚授簡賦梁園相如未至開嗚噓

過黃耳墓讀袁景文詩

路出平原村崑山何婉孌感彼山下人藉藉金閨
彥浮光不善韜奇彩輒自衍觀時昧履霜知幾忘
集霰倘逃洛下名詎有河橋變交游那可恃忠信
仗黃犬敝蓋身後緣尺書生前踐北邙塚纍纍犁
鋤無貴賤下令螻螳歡上令烏鳶歎不及此墓田
無人疑真贗我尋袁叟詩殘碑臥芳甸叟也感流
離早遂滄洲願未羨雲間龍聊處不材雁莫漫悲
黃耳且還賦白燕

江上三首

北固風濤闊乾坤一嘯歌暮鴉終古有秋雁隔江

多曠野調鷹鵠平沙放橐駝佛狸烽火地檻外滿
雲蘿

最憶東南勝飛帆早貢鮮鮫人開海市蜃戶足漁
錢沙汰江珧夜風高水母天驚鱗猶撥刺如雪照
吳船

水色連天色晴雲雜雨雲江山饒霸氣吳楚對斜
曛鐵鑠中流咽華鯨度嶺聞十年漂泊處檣燕語
殷勤

雜詩十首

選八

朝讀種魚經頗諳釣魚術持竿坐苔磯盤鍼擘香

粒意在悟盈虛無心計得失鱗婢自喁喁鹿角何
戢戢鰕行與蛭渡亦復任縱逸堪笑任公愚緇牾
太稠密東海守經年大魚詎可必

孤桐高百尺琴榦斲孫枝斤墨運離匠神巧騁般
倕徽以鍾山玉絃以園客絲一鼓幽蘭馥再鼓淥
水遲小牕兒女語變作壯士悲體清心自遠曲淡
節亦稀里耳多賤古疏越非所宜齊門聞好竽鼓
竽令人怡田連與成竅安用抱琴爲

人皆有疾疾惟俗不可醫小車一何快土牛一何
遲雲龍日下鶴語陋名已垂安能知許事且復食

蛤蜊

有客黃山來貽我松五粒種之小山隅拱把黯無
色灑灑雨露零沈沈日夜息朝來一拊摩天矯龍
鱗濕勁節凌歲寒虬枝拂雲日是物有本性變化
詎可測

隋珠非不珍彈雀何屑屑干將非不銛補履乃大
拙用苟違其材柔廢剛亦折安能處錐囊幾時離
磨蝎英雄有如此醉擊唾壺缺

鼯鼠亦卑卑斥鷃亦瑣瑣載之以車馬樂之以鐘
鼓鼯鷃始茫然跼蹐不知措何如捨枋榆何如食

場黍國風刺鶉梁大易戒盱豫君子慎其儀庶幾
免納侮

狂泉可以飲不飲狂何如鮑肆可以入入則馨有
餘君抱裸程恥同浴何挪揄所以朝歌里墨子迴
其車

良馬遇孫陽一鳴加拂拭立仗倘一鳴法在所必
斥言小可喻大鳴默須自擇馮唐對雲中片語無
拂逆安事口懸河喋喋上林嗇

遊仙三首 選二

鼉梁萬里碧天開徐福方從海上回鑄就金人如

得道焚餘丹籙未成灰
偃佺空想排雲至
劉項非因竊藥來
莫笑嬰兒姪
女幻世間鹿馬更難猜

青雀西飛繞集靈
麻姑仙訣悟熊經
玉杯日暝黃雲護
金掌風微白露零
望氣方壺猶寂寞
祈年太乙尚丁寧
君王最有長生術
不道郎官是歲星

遊秦望山莊用少陵遊何氏山林詩原韻十

首 選五

一雨連三月垂楊門巷清
怯寒遲衣袂入夏始聞鶯
敲火蒸茶乳分泉試荇羹
茱萸泝上坐隨意數觴行

秀野堂依竹高深徑
著花峰形危隱豹澗勢急奔
蛇樵語籬根細漁燈烟外賒
何當離五濁長此醉爲家

樓閣俯平楚豁然萬象開
一天雲擘絮幾陣雨迎梅林影
當牕見山光排闥來
舊題如可覓石壁掃蒼苔

爲愛藏書處時聞辟蠹香
雨蒸龍尾潤風送麥光涼
官帖雙鈎出焦桐百衲藏
竒觀眇萬物古意獨清蒼

遙天虹跨澗永夜月臨池
興至停吟屐狂來倒接

離俸錢分鶴子井稅及魚兒野逸誰同調求羊鎮
日隨

渡江二首

雲自孤飛月自明蒲帆十幅翦江行君聽濁浪金
焦外淘盡英雄是此聲

燕子磯前早趁潮佛狸城下暮停橈老僧竹院渾
相識如夢如塵話六朝

秋夜宿燕子磯明月橫空江天一色徙倚篷
牕不復成寐偶憶東坡夜起登合江樓高吟
子美四更山吐月殘夜水明樓句得詩五首

爾時意境至今猶可想見因援筆和之仍以
殘夜水明樓爲韻

一更山吐月耿耿浮雲端江清不可唾爛銀作波
瀾南飛有烏鵲瘦影落寒灘推篷瞰青壁天風吹
未殘

二更山吐月秋露哀湍瀉鄰舫寂無聲蕭蕭木葉
下我欲躡飛仙瓊樓如可借攜此白玉盤一照魚
龍夜

三更山吐月警鶴橫江起江心白於霜吳楚渺千
里潮勢撼空城荻風戰故壘茫茫商婦船琵琶撥

秋水

四更山吐月皎皎玉繩橫江天同一色蘭漿擊空
明沈沈郵籤急嫋嫋漁笛清幽露濕芒屨山寺有
人行

五更山吐月鐘杵鳴江樓天雞一以唱晨星澹欲
流衣上秣陵露枕上秣陵秋浩歌拍銅斗起助榜
人謳

平原村

年少驚傳入洛名雲津龍躍是平生八王兵甲無
臣主兩晉文章有弟兄晚節不堪愁鶴唳舊交聞

已賦萼羹春蒲細柳平原路長使行人淚滿纓

顧林亭

平林落日野王臺太息斯人一草萊白馬青袍愁
事去綠簑皂帽好歸來虞卿窮老書千卷陶令高
閒酒百杯回首風塵淪落客江南詞賦子山哀

白燕菴

鰕菜飄零范蠡船幅巾短杖自翛然柴桑歸及元
興日同谷歌成天寶年流水桃花何處問春風燕
子至今憐隔村隱隱精藍結只是當時已解禪

題畫鷹

呼鷹思擊邪放鷹悟嫉惡不然畫霜鷹亦足振懦
弱朝來開屏障蕭颯風雲作想其下筆時豪氣橫
幽朔一鷹立寒崖沈沈仰寥廓金眸養精銳玉爪
淬鋒鏑英雄未遇合顧盼殊落落其一摩層霄萬
里任拏攫得勢乘利便矯矯十二翮前毆秦氏烏
後逐紇干雀側目笑時人枉自羅矰繳毛羽旣豐
盈宇宙何開拓肉食恥稻粱巖栖陋叢薄校獵思
驪山拚飛想沙漠杉雞與竹兔俛首就束縛誰言
鳳翩翩不如鷹蹇諤誰言鴻冥冥不如鷹盤礴君
看渭水揚君看爽鳩約那能困臂鞬隨人長寂寞

鶴坡精舍

鷗遊澹春水鶴語下天風坡上滿蘿月人行蘿月
中

東谷

松桂發東谷白雲靜簾櫳獨吟斜照下容我作愚
公

竹西草堂

堂上彈淨琴堂下響流水琴聲與水聲泠泠幽人
耳

秋水軒

把釣臨風檻烟波接碧天超然濠濮想閒讀秋水
篇

玉鉤斜

馬踏廿橋霜鹿走雷塘土淒涼賀老絃寂歷隋家
路一丸明月玉鉤斜春風開遍棠梨花

邗溝旅夜讀綿津先生詩集賦呈五絕句

直探墳索源風騷傳寫宣城紫兔豪泰華嵯峨凌
絕頂世間培塿莫爭高

聲響如撞萬石鐘掣鯨碧海氣春容中州此日雄
壇坵北地西江總附庸

政事文章兩擅奇牙籤銀管夜吟遲廬山風月滄
浪水卽是烝民清廟詩

到處松寮護碧紗新詞紅杏賦梅花欲知秀句寰
區滿天半晴飛百道霞

風格漁洋足比肩冰甌雪椀鬪清妍召平心力真
勤苦檢點晴牕作鄭箋

爲邵青門

江左十五子詩選卷十三

江左十五子詩選卷十四目次

商丘宋 犖牧仲選

毘陵邵長蘅子湘訂
商丘宋 致穉佳校

徐永宣

長至前五日奉寄竹垞朱先生求為先中

丞表墓

觀延陵墓碑用黃山谷磨崖碑韻

輓暉南田先生 荆溪道中

瀨上 長干晚望次少叔韻

潤州 遊竹林寺

秋日訪朱錫鬯先生二首 選一

游法相寺登南高峰

游道場山用東坡原韻

丙子秋杪運舟東歸旅愁鄉思雜還於裏

觸日即書詞無倫次以坡翁人似秋鴻

來有信事如春夢了無痕為韻凡十四

首 選八

贈于何功先生四首 選二

靈巖雜詠十首 選四

述德抒情五言六章上宋大中丞漫堂先

生 選三

春日雜興六首 選二

雨中鄧尉探梅八首 選六

青門邵先生六十初度

曹子三蘿小舟名撥雲蓋取青蓮撥雲尋

古道之義也屬和二首 選一

寄懷查二德尹

遊滄浪亭呈漫堂先生

輓旦齋毛先生兼慰行九

題顧十一俠君秀埜草堂圖三首 選二

正月十九夜夢與俠君遊玄墓梅花下得

詩二句云一月半月香千山萬山白及
覺暗香猶浮動枕席也足成五言一章

寄俠君

題禹平水村第三圖

四月二日竹林僧舍小集朱悔人魏禹平
查悔餘查浦潤木吳山掄汪武曹東山
錢亮功張日容方共樞家兄大臨天碧
同用昌黎短燈檠歌韻

疊用昌黎韻答亮功

夏五東歸畱別同學諸子末章呈漁洋王

先生四首

選二

奉懷漫堂先生

題宋山言同年學詩圖四首

選一

漫堂先生刊校施註蘇詩竟於臘月十九
坡翁生朝懸李伯時所畫笠屐圖像於
小滄浪率諸生致祭予爲中塗冰合所
阻因呈七言長句一首

贈張三日容

次坡翁韻送楊青村之官新昌二首

選一

宋建中靖國辛巳七月二十八日爲東坡
先生騎箕之辰先生乞居常州卒於孫
氏寓館卽今方庶常僑居去余家不數

十武西林陳夫子授經其地舊蹟猶存
歲值辛巳去先生六百年矣感今追昔
邀同學諸子於是日肇祀先生用眉山
二字恭紀二章并賦洗硯池悼香海棠
以致敬恭思慕之意云

洗硯池

追悼香海棠歌

哭董二叔魚三首

江左十五子詩選卷十四目次

江左十五子詩選卷十四

徐永宣

學人武進人著
有雲溪州堂詩

長至前五日奉寄竹垞朱先生求爲先中丞
表墓

秋水漾淺碧秋柳搖輕黃駕言將何之欲抵長水
塘風伯解人意帆飽如弓張庶幾慰周飢歡喜直
欲狂先生名世姿上應斗宿行謫居近蓬萊珥筆
玉几旁詞翰切霄漢聲望同珪璋一朝卸朝衫東
山恣徜徉對門滿桑柘映戶皆篔簹賤子拜階下
幸勿揮門牆言念先君子鶴陞同趨蹌北海有封

事考核資縹緗往事愴彈指不覺涕泗滂先生敦
古誼情意雲天長向讀竹垞集薄海致辦香李杜
與下上元白相頡頏臭味合韓柳筆勢凌歸唐今
見竹垞人咫尺驚望洋古人重不朽要須托文章
或作表墓道或勒銘幽堂重懼先德湮中心時皇
皇又以難其人四顧徒俛俛不藉先生文潛德何
由光慨焉許載筆爲善庶有望銜結共存歿矢報
鐫腎腸念昔南豐曾求銘於歐陽又思南軒張乞
靈於紫陽其爲感與報海嶽詎足方寒牕寫蕪詞
繫與雁足翔高飛東南隅早墮煙雨鄉布鼓過雷

門堪笑不自量蓄意事大賢藉此冀少將天寒有
飛霰風勁多凝霜伏惟加珍重端居養初陽

觀延陵墓碑用黃山谷磨崖碑韻

江流泱泱迴申溪高原嵯峨延陵碑東家十字重
九鼎東吳千乘輕一絲古來釀禍緣立愛先王一
念殃羣兒窟室血濺堦東西人命輕塵弱草棲爾
殺王僚吾殺爾骨肉搏擊徒爾爲歸來哭故奉新
主魯哀十年猶率師屈指春秋幾百歲救陳遏楚
一指揮延州來人皆安之食租衣稅身不危歷聘
摩挲隴頭劍觀風嗤點中州詩有化無死古真人

後來知己蘇軾辭屬鏤絕脰抉兩眼鴟夷浮江國
亦隨甬東寒食無麥飯春風吹蕩千年悲

輓惲南田先生

丁年最小便玲竈國卹家憂早備經兵燹誰憐生
病死梵鐘獨弔影神形旋拋禪衲更萊服只摘園
葵供鯉庭畱取黍離無限意白雲深巷寫丹青
卜居長傍敞廬東祇隔溪灣四五弓曝畫湖州真
草草賦樓天上太怱怱書籤零落晨烟白門巷荒
涼晚照紅點檢永和殘墨瀋幾番清淚灑西風

荆溪道中

沿溪弄潺湲波紋時在掬一曲撐一篙一村流一
曲蘋洲生白花麥甸泛新綠遙望銅官山蒼翠盈
兩目清思戰茶槍狂吟散鷺鷥細雨濕魚梁荒烟
罨林屋一幅烟雨圖向此圖中宿

瀨上

舊是吳中路今猶水上村英雄垂死地女子令名
存城小關門早官稀醉尉尊主人情款款難得夜
深論

長干晚望次少叔韻

春暮飛紅散作泥望中烟雨濕靈旗樊川麗句收

難盡又入潘郎一絕詩

潤洲

江山如有待我輩此間行山上南朝寺江頭北府城三春添黛色萬古一濤聲閱盡東西客勞勞役利名

遊竹林寺

朱朱白白花遶村透透迤迤山帶城城南夾山有古寺曳杖試作尋僧行竹林深深人不見山鳥格磔東西鳴須臾徑轉見殿角一僧階下相邀迎憑闌試望大江北樹杪一抹烟微縈象山很石入吾

目孫劉昔日何崢嶸英雄意氣未銷歇逆作江上風濤聲題詩一笑下山去嗟我懷古何由平

秋日訪朱錫鬯先生二首

選一

沈尤村僻絕塵寰千个篔簹水一灣學道著書無箇事滿庭黃葉對秋山

游法相寺登南高峰

帶雨下雲棲身過林間濕蒼翠滴衣襟韻事良可悅行行過于墳西去覓勝跡蹇驢拋寺門且著上山屐宛轉扳石磴小丘堪小歇所供長耳僧云是定光佛上下兩法身真妄一解脫錫杖出山泉竹

笳引香冽透迤入積厨千年不曾竭再上勢最高
芳草被嘉石西望一小菴炊烟時起滅溯昔開荒
榛自是人間傑委身兕虎間世諦那許說永明偶
饒舌錢鏐仰芳烈摩挲遺碑間生紙何處乞

游道場山用東坡原韻

濺濺雲水環山麓六十六祖在空谷東坡畱題墨
猶新行人愛翫情難足夕陽西下草漫漫伏虎禪
關似虎盤凌雲礙日拔古木掄金戛玉鳴哀湍客
子入門僧不出松風泠泠拂禪席照眼蓮塘雪牖
明過看藤杖虛堂植諸峰旋繞列烟鬟都在蒼茫

翠靄間借問何山在何處樵人指點山南山縱游
我已忘昏旦忽聞暮鐘起山半攜筇歸向小舟眠
夢魂眷此還三歎

丙子秋杪運舟東歸旅愁鄉思雜還於襄觸
日卽書詞無倫次以坡翁人似秋鴻來有信
事如春夢了無痕爲韻凡十四首

選八

涼風起城闌送此坎廩人朝離長安道暮宿潞水
濱賣馬別軟土買舟碾濕銀書籤滿歸橐錯雜如
魚鱗霜蓬壓短檠古意冉冉親回首西向笑得失
何足論

長路恨綿緲况復當杪秋荻花映楓葉牽我江南
愁素娥鬪青女寒氣侵衾裯客子不耐冷又苦無
衣裘西風故欺人一夜聲颼颼

窺牕見新月燒燭聽晚鴻晚鴻塞上至逐我還江
東新月照鍛羽悵望孤篷中蒲帆十二幅聊趁西
北風形如乍開扇勢若全張弓瞥眼過齊魯旋指
一畝宮東籬菊綻黃南浦楓搖紅秋茶待歸客煮
之配青松

平生讀書志愛與古人友只今返釣磯寧復風塵
走一室春盎然何嫌小如斗詠歌先王風彈琴而

鼓缶以茲勗明德祛彼外物誘區區噉名情一呷
夫何有

古者設津吏稽彼言服異後來此義亡藉以獵貨
利行李一何艱誅求一何恣欲寬無時寬欲避無
地避往者競怨嗟來者皆涕泗皇天仁愛人毋乃
乖撫字紛紛冠蓋徒忽此爲細事

愁來渾無端如被薄寒中豈若昌黎窮可以作文
送庶幾讀離騷葉雲破愁夢方干有同懷飲酒寧

辭痛

舟中與靈
臯讀楚辭

秋日苦易斜秋夜苦難曉因之布楸枰黑白明若

燎當局時昏昏旁觀自了了爭先在一著所失乃
匪小重瞳尚可憐矧彼湘東眇興亡類如斯袖手

心悄悄

看靈臯東
委對奕

近聞大河決水勢當奔渾秋深謀築堤或可復舊
痕行行渡大河望望歸江村江村指日到阿母免
倚門定省隨阿兄無間晨與昏養親兼讀書愛此
秋樹根

贈于何功先生四首

選二

西泠舊事半模糊訪友勾留是兩湖春色三分傷
杜牧寒泉一盞弔林逋空餘殘照陪遺跡剩有荒

山入畫圖遙憶蘇堤袍樣綠斷腸細柳夾新蒲
曾記春帆綠水時更深軟語燭花遲聽殘鶴唳清
無睡驚醒雞鳴耿有思臯羽漁樵堪作伴所南薇
蕨未爲飢若教顏色如長好但進青精酒一卮

靈巖雜詠十首

選四

荒山絕少足音梵禪板聲聲帶梵鐘三萬六千晴
雪浪和烟吞吐莫釐峰

那有姑蘇舊築臺舞衫歌扇付秦灰空餘響屨廊
前路樵叟芒屨自去來

釀酒城高亞字西雨淋風捲越來溪暮鴉那管興

亡恨枯樹梢頭盡意唬

野花零落舊燕脂悽絕空山叫子規不肯再施傾
國手故教單舸逐鷗夸

述德抒情五言六章上宋大中丞漫堂先生

選三

千秋大雅材世出不數人色正光芒寒漁洋與綿
津羣山赴荆門萬物迴皇春歐陽議政事猶沸識
者脣我公擅通才無事類飲醇禦變雷雨奮旋轉
疑若神始知有三立文采特爪鱗詞人弄吟筆徒
效西子顰

懷古夢平臺快讀梁園賦况聞淥波村清切天漢
路前年上征車錯莫此間度不敢驚鳥猿悄悄冒
霜露行行見翁仲云是文康墓肅焉起敬恭再拜
摠衣駐父老頌嘉德涕泗有餘慕奕世節鈇高素
風不改故子姓秉躬行枌榆荷珍護

丹山富桐花雛鳳聲遠聞發音應韶濩將以奏
聖君藉藉公卿間朱絃過白雲賤子席帽至貰酒
將殷勤譚道啟濂洛論詩述河汾出門指秋柳狂
吟狎微醺矮紙呈我公粲焉播清芬何幸樗櫟姿
謂可施斧斤河干沃軟語蓬心妙香薰

春日雜興六首 選二

南田宿草久芊芊，猶有商丘歎逝川。
情似蘇公曝畫日，悲同魏武過車年。
只今食指頻縈念，此後詩名好附傳。
珍重遺編親囑付，雪牕檢校不成眠。
漫堂

先生屬予編次南田遺詩欲付荆氏

田舍相邀老瓦盆，關心春隴夜深論。
綠楊煙薄新晴路，紅杏花寒暮雨村。
買犢有懷耕未得，活人無力意空存。
年豐倘藉諸公致，從此何愁吏打門。

雨中鄧尉探梅八首 選六

望裏寒梅萬萬行，湖光淼淼接花光。
未須身入吾

家 山名路春水春風盡是香

江南春事足清娛，第一梅花不可辜。
曉雨帶香衣袂濕，倩誰畫我入山圖。

風渡寒谿雨壓塵，芒屨籐杖趁閒人。
山中樹樹都穿遍，抵化雙林百億身。

雨腳如塵遠近迷，探梅人不怕衝泥。
白雲空際閒舒卷，似護寒香作意低。

冷香直欲鬪春溫，處士西湖正掩門。
卻憶去年江北路，關山細雨黯銷魂。

一白千山失曉青，冰魂雪骨自亭亭。
太湖漁艇空

濛裏勾引寒香過洞庭

青門邵先生六十初度

羣山如玦抱毘陵遠江如帶圍城郭清淑之氣於
焉窮盛而不過乃磅礴青門先生生其間上應列
宿光爍爍少小卽擅神童稱稍長讀書愈該博詩
似神鷹乍脫鞵文如天馬初卸絡長安道上諸公
卿觀者一一駭以愕豈知屢困燭三條絕意進取
尋丘壑乘風南上瀟湘船雙壺買醉滕王閣訪友
東看錢塘潮一把欲踐林逋約北征帝里登燕山
翩翩裘馬攜藤箬西過任城吟酒樓村村花柳遮

簾箔無何游倦賦歸來獨抱遺經臥寂寞春雲藹
藹月溶溶秋空凌凌烟漠漠著書味道春復秋神
如龍馬姿海鶴商丘夫子填撫吳爲遣長鬢款門
鑰相要文酒過衙齋一似開堂一行腳有如烏公
鎮河陽水南水北爲所攫後生考德將於何一時
猿鳥皆驚攫先生客冬返章湟地名小子初旋自京
洛執手慰勞情話長心路於此快一淪落燈重過
雲溪頭細雨簷花動春酌示我新篇名井梧色正
芒寒刮眼瞶矧乃嚴詩附杜編望洋益覺難爲度
銜卮顧我爲我言與子兩世稱逆莫先公與我偕

采芹追念夙昔猶如昨吾兒與子同釋菜兩家情
意羅浮若我今甲子及一週索詩於子忍勿諾小
子聞言淚濕衣先生懷抱亦不樂先生歸然魯靈
光先子九京不可作風木悲填胸臆間賦詩心手
頗格格頌揚詎當萬一分要爲仰止抒大畧牽連
世好告先生敢以巴歌侑三爵

曹子三蘿小舟名撥雲蓋取青蓮撥雲尋古

道之義也屬和二首

選一

溪北卽青山相望數里間借君垂釣艇載我款花
關書畫隨時翫烟波竟日閑張融居岬上那解泊

漁灣

寄懷查二德尹

我別查兄時霜染津門菊到今池荷開歲月何迫
蹙憶昨客京師相識值中伏長我踰廿年而乃以
弟畜我常過兄門垂鞭每瑟縮值兄溫經眠不則
看花出叶吾與司閹人問答語輾轉至今清夜思
情貌宛相熟當時感吾誠兄亦頻往復霎焉槐花
黃制淚同斥逐紙牕月荒荒庭樹風謾謾卞氏抱
玉嗟鮫人捧珠哭我視兄恬然無尤亦無恧但念
將別離兩意逾頻願送我詩三章湘筴親手錄幾

度吟詩篇連番奉箋牘惻勉非一言得失譬蕉鹿
誨訓披膽肝道誼兼骨肉合并定何年憑仗清夢
卜明春倘南旋襍硯應從陸水驛苦濡遲山程喜
遄速足音跼然聞穿花入空谷酌酒破鬱陶笑言
慰幽獨輕舟繫垂楊小榻傍修竹長年莫催歸十
日溪堂宿

游滄浪亭呈漫堂先生

先生撫吳之三年政成事簡人安全行臺如水脫
官樣吏胥不擾吳民眠乘閒遍探山水窟得句揮
灑雲濤箋就中酷愛滄浪址不惜清俸捐千錢其

上縛亭下築屋綠浪環繞流濺濺風風雨雨客不
絕十十五五人相連先生小隊時駐此勿叱履錯
從其便我嘗問字過吳苑每坐亭畔忘言旋豈惟
褰裳嗜古迹實亦斂衽欽前賢伊昔黃州雪堂圮
先生一顧情拳拳鳩工刻日命修葺小減鶴料增
級輒至今茲亭又經始灑掃祠宇肅豆籩兩蘇勝
蹟可對舉兩蘇知遇皆前緣畫屏作圖乃細事會
見風雅千秋傳

輓旦齋毛先生兼慰行九

花前頻藉一筇支槐柳侵門臥水涯經國文章畱

郡志傳家風雅說毛詩魂銷秋海烽烟裏淚盡春
風麥秀時史冊他年爲立傳此心應有後人知

題顧十一俠君秀埜草堂圖三首 選二

柳邊深巷名鸚武池畔孤墳是妙巖坐愛圖中好
風景不教鴨背挂蒲帆

疊石爲山枳作籬吟詩花底聽黃鸝此中藏得元
人集可肯抽籤借一瓶

正月十九夜夢與俠君遊玄墓梅花下得詩

二句云一月半月香千山萬山白及覺暗香
猶浮動枕席也足成五言一章寄俠君

好花如好友宜共數晨夕况乃鄧尉梅不與百卉
易平生愛此花自笑竟成癖看渠忘食眠不解誰
促迫宵來夢輕舟直底費家酒適遇顧虎頭同理
上山屐箬笠穿空青棕鞵踏層碧水邊影纔橫籬
外蕾未坼月下光皚皚風前意脈脈一月半月香
千山萬山白仙魂歷千春毋乃玉妃謫祇應神相
親未忍手加摘酌酒酌花神引滿進一石梅花賢
主人二子非惡客醒來失梅花意境忽不憚因思
吾家山道路寧遠隔興發便往遊恣我十日索此
事卽不然只今取自適夢中帶香歸但要嗅枕席

作詩寄虎頭博取笑啞啞

題禹平水村第三圖

圖爲宣城
梅耦長畫

都官墨妙壓倪迂一曲拖藍兩岬蘆不是軟塵看
愈厭底須三寫水村圖

垂垂風柳烟如織湛湛春波碧似紗忽憶雲溪新
月夜落魯聲裏櫓啞啞

四月二日竹林僧舍小集朱悔人魏禹平查

悔餘查浦潤木吳山掄汪武曹東山錢亮功

張日容方共樞家兄大臨天碧同用昌黎短

燈檠歌韻

青山看盡白日長疎雨洗出繁花光殷紅千片苦
日炙孰變炎熱成清涼三春堂堂背人去綠陰如
蓋遮禪牀此時作客尤愛客春衣典酒真佳策酒
徒得句恥雷同半擬杜韓半元白吟罷欹倒書牕
前茄簾似水容醉眠醉裏狂言轉奇恣老樹空庭
落新翠朝來倘看花市花莫爲途迂忍遐棄

疊用昌黎韻答亮功

月落不照清宵長風靜猶閃孤燈光六街一夜送
梅雨老女棄婦均淒涼差池燕羽泣岐路異夢喚
醒非同牀妾嫁浮梁買茶客空船楓荻鳴策策不

如老女臥東家自在施朱與傅白矧今一斤不復
前柳枝三起旋三眠牽蘿侍婢縱嬌恣那救天寒
薄袖翠不售老女會須售天生麗質寧久棄

夏五東歸畱別同學諸子末章呈漁洋王先

生四首

選二

耦耕已過浸秧時飲罷蒼茫獨詠詩西笑浪隨風
裏絮南飛又繞月中枝龍文拋作春三夢驢券寧
愆夏五期猶恐艸堂猿與鶴怨吾歸比岫雲遲

孟郊南去馬寒鳴猶有昌黎慰不平三宿桑陰愁
話別一旬梅雨似畱行

記漁洋先生
手帖中語

蠹魚卷軸千秋

在烏鳥窠巢五畝營到日小園兄弟好板輿花底
御新晴

奉懷漫堂先生

半壁東南地窮眈命倚全熏風千塢扇春雨萬村
連淮右哀鴻集江鄉雉雉翩辛勤催鬢白深荷
九重憐

幾畝滄浪水紅蕖菴綠蒲杜編傳二讓韋集記三
吳賓從如前否郎君已到無薛收行侍側攬入學
詩圖

題宋山言同年學詩圖四首

選一

桐陰蕉影綠遮天詩話煩君陸續編此後蘇門香
一瓣只須親致小斜川

漫堂先生刊校施註蘇詩竟於臘月十九坡
翁生朝懸李伯時所畫笠屐圖像於小滄浪
率諸生致祭予爲中塗冰合所阻因呈七言

長句一首

遙遙景祐六百載西陂直接東坡翁吳興註本刊
愈好小李畫圖傳最工門下秦黃爭壁壘庭前過
邁相磨礱江東孺子賦命薄辜負滕王閣外風

贈張三日容

十年讀君文前年識君面今年過茂苑一日一相
見舟刺齊女門嘉辰共良讌醜酒讀玉杯徵歌聽
珠串有如亡忌約十日忘渴勸古道苦淪胥藉君
溺得援詩文逼昌黎風義尤悃悃春風了無痕著
物無弗徧爲我染霜毫爲我炙凍硯序我雲溪詩
題我草堂卷游絲裊百尺晴曝飛疋練深情鬼亦
泣健筆犀可剗當代大作家擊節每稱善酬當用
白縑贈乃獲黃絹自愧聲過情中夜頻輾轉黽勉
共歲寒報君以婉孌不見二之日朔風釀飛霰梅
蘂香透簷竹實色猶茜

次坡翁韻送楊青村之官新昌二首

選一

秋山螺青鴨綠水筠州屬縣宜豐美清風謾謾清
於冰所至可愛如君子亂山深處調絲桐流水聲
中曳棕履新詩脫手似彈丸曉牕和者栗畱耳淵
明昔未徙柴桑相傳此地其故里至今猶有洗墨
池池見使君應亦喜編排陶集和從頭三峽倒流
一儂指坡翁和陶涪翁評今番冰雪誰評爾

宋建中靖國辛巳七月二十八日爲東坡先
生騎箕之辰先生乞居常州卒於孫氏寓館
卽今方庶常僑居去余家不數十武西林陳

夫子授經其地舊蹟猶存歲值辛巳去先生
六百年矣感今追昔邀同學諸子於是日肇
祀先生用着山二字恭紀二章并賦洗硯池
悼香海棠以致敬恭思慕之意云

鍛羽南還月下枝文殊問疾倍支離夢縈竹屋風
前樹心繞觚稜雨後葵已分孤臣傷骨鯁可禁衆
女嫉蛾眉憐才只有宣仁語千載追尋五夜悲
白雲深處碧波環詩讖無端落此間回首古橋衰
柳斷傷心小院野花殷魂歸月黑疑儋海鷗沒天
低憶故山直接岷江溪水是瓣香裊裊淚潺潺

洗硯池

屋西洗硯池水石千年寒不知始何年截取青巒
屹猛哉匠石氏盡力爲剗剗廣僅三尺奇高乃並
藥欄質從朴夫朴品比端人端春波綠似染側漾
竹數竿秋紋淨於冰倒浸月一丸象離虛其中習
坎洄厥湍當時玉局翁龍尾裏綺紈貪潑莘老墨
愛彈管城冠硯生嶺外雲池帶紫海瀾疑有蛟龍
潛光怪發夜闌只今鯨魚樂不較澗水寬百五疇
藕苗花葉濯錦攢一從出汗泥松心汁爲餐賸瀋
雨餘溢還潤湘江蘭好事曷弗攫移置千牛難君

看崑岡玉美好猶焚殘硯池臥雲溪乃以頑自完
齊物物不齊喟焉起長嘆

追悼香海棠歌

蜀花花種來江東不鬪李白爭桃紅天教鴻鵠銜
子到萬里遠伴東坡翁坡翁去今六百載三十年
前樹猶在青城白雲呼翁歸香魂冉冉疑追妃緣
慳奚自識仙葩枉然拚擲西鄰家小溪夕照人影
亂往往故老交驚誇春蘭秋菊競秀發菁華涼薄
旋銷歇此花空谷倍嫣然四時長似春三月恍如
夢入芙蓉城翠屏珠箔千娉婷風輕日暖香漠漠

酒潮燈暈光冥冥
鶻淚怕染冬青血
燕泥愁汗胭脂雪
定惠無人悵獨吟
柯丘有句從誰說
無端劫火與花讎
斷腸夜壑追亡舟
蜂愁蝶怨銷不得
五更怪鳥鳴啾啾
我聞斯語重太息
直欲窮搜衆香國
亂灑猩紅碎錦鮮
遠捎魚尾殘霞色
只恐峨眉嶺歸路
長海南杳杳無真
香魂招坡翁或來
格海棠魂返終渺
茫江南花信番番
有絕艷一株重到
否來朝箋語祀花
神陽羨秋茶惠泉
酒

哭董二叔魚三首

豈料過長至翻悲
病轉加無兒元九
淚有女左思

家岍自銷魂柳簷
仍索笑花梅坪吟
賞處蛛網暗

牕紗

藥分開府俸

商丘公頻年惠葠藥

賻盡故人情破屋
寒于社蒼

頭媿似醒號同花
自悼詩與病相成
悔祀看山老

攜君返太清

叔魚祀蘇詩成語余曰吾自號海棠願今悼花得毋自悼耶不謂斯言竟成詩識

死目無時瞑傷心
爲倚門雞鳴催曉
夢鴉噪欲黃昏風
折孤生竹霜欹半
萎萱嗇君豐毋壽
堪慰九

泉魂

漁陳
漁侶

漁師
釣竿

綸
餌

釣
竿

鴉船
魚標

跳白
甕浮

校衣
魚艸

花籃
蛤燈

龜枕
換酒

柳條
易薪

煮魚
月

風
曉

晚

漁人

寄答邵子湘二首 選一

九日

踞酒石歌

送梁鎮海明府

商丘大中丞寓齋觀明宣宗黑白二鼠圖

除夕再疊東坡歲事韻三首

早春幽居

東坡生日詩 小序

滄浪亭卽事

小滄浪聚飲四首 選一

近游二首 選一

瓜渚阻雨呈菜翁

吳船竹枝歌二十五首 選七

十番詞

流水

傾蓋亭

寄黃州許使君二兄

四首 選一

過西邨感懷

晚發真州

觀馬兩岸微茫不辨牛滿目亂萍誰襪五年空
屋斷鉏耰九重敬止幾無暇百職疇咨 聖有
憂吁咈不須煩岳薦撫摩全似爲身謀雲行雨施
親投袂淵默雷聲速置郵贊畫半因神授策效靈
長見物扶舟 帝懷玉斗爲符契天錫元圭若獻
酬東向攝提原好在南趨良駟卽優游攝畱繼體
乾心慰出奉 思齊子職修廣爲含弘成覆載細
因滲黷盡綢繆雙龍羽蓋籠千騎八鳳珠旗擁萬
騶畫獸紅鴛迺近甸樓船黃篋載清流望洋海若
趨雙帆服石馮夸護九旂四隩五方咸隲括三江

九谷盡雕鏤壤民往往輸單犒芹野紛紛獻束脩
玉枕金鎚欽 聖裁寶文奇字煥 皇猷豆花乍
去波如練瓜蔓新平水似油曉有桔槔鳴壠曲夜
聞礮碌動場阪縣炊舊色歌無麥揭屋新聲慶有
秋滿目江山如畫好一時顛沛似忘休虎旛拂雨
臨長塹鸞篲除塵引去輜玉帛萬邦朝越嶠烟花
三月上吳樓鶯聲曉色黃鸝巷燕子春風白鷺洲
泣罪蠲除彫以上施金填咽道之周棲田滯穗緣
民散飛輓餘糧遣吏凋漫士不歌駒皎皎嘉賓多
賦鹿呦呦九疑舊隴荆榛晚一代遺祠象設愁躋

敬恢恢除鹵簿抑尊耿耿具樽卣廣心竟感人成
泣 聖化真令俗不偷弊邑數曾勞篤祐省方尤
以盡旁求月明橋下偏曾駐春貢亭前亦暫留蹠
躩玉花嘶 內仗葳蕤瑛蓋見 前旒彩烘霧縠
昏新市金染雲棚壓古丘屋不呈材因藻繡樹能
衣錦見松楸千家棐几迎華轡一路香塵浣錦鞦
問夜轂騎依火樹埽街關吏得環榴白雲未許山
川阻黃竹何曾雨雪漙宿麥展敷舟外芻飛花團
簇馬前毬森森綠野無吟樾激激滄江失聚漚萬
姓始知依父母三驅直此是懷柔寶跗妙蹟妍逾

勁玉硯仙蹤老更遒驚湧鶯鸞洵絢爛騫軒蛟鳳
寔弼彪丰容上可吞王謝筋骨兼能奪柳歐亘古
帝王誰問鼎祇今觀仰似乘桴輝輝彩榜懸名刹
燦燦香牋錫遠猶供佛晶瑩明玉雪表閭光耀重
琳球小夫夙有編蒲手賤子渾無濺墨頭狂學仙
顛傾冷汁勢如羌渴遇新筍偷看鳳采清無比退
檢豬肥陋不庾羣玉自緘文句獻廣文兼取畫圖
投恰逢 天笑遭存問過奉 皇綸爲勘讎蕪貌
不曾繩草莽莠言兼許雜薰蕕都俞命侍傳橐矢
邪許從人發櫂謳三入 君門真忝竊再承 榮

問寔蒙庥 奎章閣里知延領瑞色衡茅頓滿眸
句裏賡揚能道少門前車轍索觀稠簡編紀事無
如者袞冕榮人有此不點拂灑然仙手出縱橫負
與聖工侔變如 聖治神寬猛精似 皇心合競
練敬肅禮筵瞻鼎豆森嚴兵庫識戈矛疾牽雲鶴
身輕過緩引冰蠶繭亂抽燁赫儼然跳虎闕澄清
誰敢唾龍湫仰看半世承心失細玩平生痼疾瘳
破屋似曾千黜堊茅堂今有萬貔貅取將未要丁
神得呵護還須甲帳優臥對直堪移榻宿飽觀渾
欲忘飢調幾番畫肚如模鼓百步棲神似對侯一

室凋疏慚壁立十年窮賤愧岑牟情甘瓢挂空巖
老遇比圖侵近野捺鹿鹿駑駘初顧樂蕭蕭寒谷
乍逢鄒勝緣魂夢如登閭凡骨飛騰比跨緱薄命
飄零忘却桂鈍根銚鏞歎吳鈎功名大率孤蓬梗
身世胡然一海鷗面目漸如逃世客衣冠直作戀
家囚珠無上客三千履瓦有狂歌十二甌伴客海
濱施數牯同人池上樂游儵蘇門迴首聞孤嘯莊
岳冥心失衆咻嬾慢學山虛簷屨厖隤文陳脫兜
鍪自應別覓三年艾詎可長披五月裘三畝蓬蒿
迴客駕一編燈火下予鞫仰思 聖德終非次莫

戀麻衣浪漫遊

海鶴

海鶴東南飛仙心何浩渺霜輪蔽長天風前九州
小海嶠殊卑幽洪濤無棲枝鄉閭老仙叟欲上雲
背騎流沙不可去北望涕洟瀾冲霄若未可且食
青琅玕

有鳥

有鳥被奇羽棲遲在幽谷竹實傍流泉食飲媚幽
獨頃者逢青鸞招邀上喬木未終隨翱翔日暮鵲
聲哭南山多孔翠北山多鴻鵠聲氣相為求匹遊

在林麓匪云誇乘居聊將慰雌伏願言文采色永
耀同羣目世人莫能求深山花麗寂

昇天行

女媧團土為下民散落萬古如輕塵請君跨鳳凌
紫旻昇天下視何繽紛或如蟻聚或蚊分或如獨
殘而然羣或如鳩惰蛻娘勤或如蝟重狙公輕蟣
蝨據絮為郭城醯鷄覆甕成乾坤鼃黽閣閣談虞
軒化導科斗歸文園腹中蠅虎排三軍蠪蛸偏裨
蚍蜉兵綬帶好鳥居然紳下有禮鼠拱揖鸚鵡言
雋周北嚮鷓南騫文文自喚雙雙連搗合鹿聚鶉

善奔鬻乘厯比鳥輕婚阿紫戴面工乞墻脂粉夜
勾山姑貧而乃自號爲娥英其間貴者稱鳳麟亦
角其首毛其身戴仁履義徒云云何況五德雞翁
村四溟水涸鵬化鷗六月輒息飛苦辛爰居折翼
低氾氾吹呖一響驚飛掀雀長鳧短不可勻鸞孤
鴛匹誰仇恩龜肥不男蠶無婚螟蛉僞愛烏孝真
完山兄弟鷓君臣海鶴水石家飽溫鼯鼠滿腹猩
猩醺顛當片土能守門舍利不吐翻自吞鳩鷄畏
雌疎六親禿鶯扶老欺兒孫狂眈喜囀多笑顰蠹
刺蠅矢潛肩臀鯢居鮒入移權鈞鱗火不徹然犀

津豈能蠅矢污純璫正恐蠹口摧昆侖貓目過午
如流銀惜雉失聽狼眼智兔口說缺遭其嗔不如
學慧無牙齧悲夫陽鴈江之濱蘋汀寄食蘭爲紉
鷺閒鷗信風標新相與撫摩交吟呻翟犬入室百
祿臻坳堂誰肯資神輪南山霧豹廉有文豈肯嘆
嘆隨豕豚腹芒橫浪朝溟宮會因尺水鳴龍闈晶
晶瑞甲添凡鱗萬類乃敗愁心殷請君下視何續
紛蠅蠓體莫辨卽周語不聞風翔雨舞朝與醺不
知嚇笑還悲冤頑蹠浪翼忙跋跋我將上挽三十
六帝臨其藩認此黑頭種種蟲何名紅脣鈔利過

於鷹鷂橫目狼顧莫可干攫足少於豸能胡越行
背無一翮思搏烟雲螭蛄之業而云千春蠻觸戰
角川谷銘勳天清地寧長氤氲因此上塲下贖山
川崩湮大津淹沒烈火焚魃目灼灼螟翻雷電
奪魄瘴霧熏尸京血杵百六屯墨劓荆辟九刑明
寒熱末腹六疾均六極備列三塗陳北艷萬里如
延賓兔鬢松脂戕心源妖容澹態伐性靈五聲鏗
鏜味脈腦歌哭跪拜勞骨筋百賊不盡生愈繇蓬
蒙馬鬣空陵墳天帝旄期倦思昏聽其自轉如脂
輪近者鹿鹿尤多端眼中無物可比倫祇洎苦縣

跌宕人畏此卻走寬閒濱我胡不去入其樊當與
溟滓游無垠安能汨沒傷心魂

行路難一首

縣牛頭賣馬脯蹠跣心情孔顏語親兄能狼父能
虎何況山川眇秦楚悲夫蜀道難於上青天世路
比此尤顛連癘疾而憂王矧我白門韋布之窮編
乳犬會攫牛伏雌能搏狸妍皮媿骨巧相倚弱肉
強食今倒施吾乃知富不如貧貴不如賤生不如
死向禽斯言吾未已大智不如愚大巧不如拙哲
婦慕蕩夫賢親愛愚子十年馬齒長萬里車生耳

犀顛化作雞皮翁不測人情似觀水人之相去如
九牛尾頎然而長崢然而矮何肥太瘦兼媿美力
田不必遇豐年刺繡未成工倚市箕有舌屐有齒
惡毀讒之囹弭謗怨之始樂莫樂新相知悲莫悲
生別離君觀操戈是同室離羣投杖何悔爲耳餘
早會合張范長參差君子澹若水小人甘如飴豢
豕作禍具乾餼乃愆資孔堂足樽酒李氏高門楹
吁嗟乎世路之難難於上青天穉子浴深水跛羊
遊絕巔不知臥薪危常作覆孟安行路難路險惡
一日七十毒神黃死嘗藥測景量地盡廣袤會見

康莊蘊鋒鏑一蛇耆乾山用焚五鹿巖巖折其角
舖醜顛頽沈諸淵守元寂寞投于閣陶潛惡五斗
乞食亦何有范蠡逃烟波殺人奈子何朝廟固機
辟山林亦罔羅行路難歌吾詞縱酒又腐脅太息
愁無知知其雄守其雌食其時動其機一龍一蛇
變化無時鵬風有時舉犧服無心期古之和光人
鬱焉吾所師塵海波如丘吾乘太乙舟登躋入雲
霧滅沒隨波流翛然寄意紫霞外行路雖難吾不
害

牆上難爲趨行

平地不肖立下上高竿頭此事豈不樂但恐難淹
雷奔蠶化藿蠋越雞覆鵠卵此志豈得無正恐成
功罕我愛陋巷子知足耕磽田更有塞上翁得失
隨因緣正廩良已苦結車吾病焉知如禹湯不如
長耕漢陰抱甕拙者機先挈餅之知小用則便馬
如狗朱伯厚千里玳瑁牛鞭飼非一手鄉閭人稱
馬少游馬革裹尸銅柱陬不如子孫奉足妻扶頭
君不見精思得暴卒絕臚亡其軀卵膚豈任石牆
上難爲趨

龍浴

辛巳春渡江舟中程
先生爲余言庚午事

赤帝下浴低雲藍百尺高浪掀聲酣橫傾墨汁痛
塗抹不辨上下忘東南豐隆列缺四天落陰火上
燥千山嵐亭毒不立萬彙敗杞憂無怪心如惔盲
風鼓盪鱗之而墨雨掩冉髯鬢髮峰枝想見古銅
角棖梳碧落如釵簪弓身揭浪自醜灌尾鬣劃水
排戈鏃不禁快極一掉臂疾雷恐有山沈潭蟲沙
埽沒魚鼈失鯨吐鼉作誰能參昏森萬里一空闊
但有天水龍成三須臾妥尾入溟漠水立若筆相
吞含峽源涓涓數斛綠禹功可惜龍母貪請天速
設紫霞幌拂拭老甲眠如蠶有客江干據危閣淦

澆小吹搖詩龕頃之梁栢響暫宰漸似跋馬危驂
驪豈有鐵盃可收拾斷非燕脯能嘗探不應潛藏
是龍德始知蹴蹋非驢堪偷窺伏榻罔所據失聲
往往呼瞿曇列榆天衢淨如拭豈亦塵土須披搨
江今已是納穢物鎖聲梯影頻懷慙百年往事未
湔滌固知龍耳空輪儋何須激濁自置悞但取普
澤爲霖甘牕中何人敢畫足文泉老子空誦誦憶
我前年歲在卯親承龍視恩泓涵當時見田亦奇
遇未能附尾成榮談禹門赤額益落魄霜雪歲莫
哀梗楠相逢形骸縮似蝟自視面目昏如蚘因君

所見忽惆悵空江澹蕩歌聲錯

已卯夏初余謁
九重於瓜渚

牛鳴東邨三首

選二

豆架瓜籬白竹門桔槔聲歇打場喧老農八十今
閒得擇蝨殘陽倚廢垣
曉寒如箭宿雲屯白樹溪橋紅葉邨人事不來書
卷合一樓寒雨看秋原

挈音集

小序 錄三十首

余有幽居在葑塞甃社間兩邨隔溪可立而呼
比年湖溢農事衰落然當水枯霜降之時榆楊
縱橫菱蓼旁雜小家三四夜戶不閉猶然一樂

土也其間人望衡對宇以漁爲業園郎釣叟各有專事余嘗讀書其間風晨月夕往詣過從嗑然而笑愀然而歎翼然而趨植然而立無非菰蘆曾粢中人寡芳笠澤恒有歌詠夫以東西南北之人爲蒹葭忘世之語宜其不情顧余之單心於漁釣樂安閒而喜原野生而已然其於世也跌宕而無所施跣弛而不相入他日之稅駕當在於此夫何言之而不親語焉而無謂也乎至於文之不工則余之弗講於此也久矣牛鳴雙邨郭元鈺

漁邨

綠楊藪澤中茅屋亂叢簇楊柳成門閭芙蓉作家國縱橫邨巷小宛轉溪橋曲江湖汗漫波得此恬心目

漁家

茅舍亦具體几案亦備物衆器無兼操時時腥一宅祝牧有夫妻鹿門無主客何須剖腹璜青齊作家室

漁市

橋頭與堰尾青篷結沙市賣魚雜鰕蜆好事兼蓮

芟傾匡竭吾藏未厭公儀嗜尚有半尺鱸沈籠不
多地

漁社

江鄉東社秋漁舟維且造蘆刀雜瓦甌豚蹄祝蒸
罩元真太湖公緬諱先漁號誰爲祭酒者宰魚饜
同好

漁陳

雙鳧出千汊鏡面波層層有美過丙穴其多如秋
蠅與君合一圍水獵誰先登堂堂落雕兵魚麗宜
佳稱

漁師

耳能辨魚聲目可知水色何妨竭澤收網目重重
密絳帳皋比翁學海無茲術銀鱗滿書簾半得吾
將乞

漁侶

結交在鄰比事業無愚賢相逢蘭芷汀靜語白日
偏有酒待歸舍得魚或忘筌荷君補遺闕家具寧
舍旃

釣竿

楊花已蓋溪龍孫趣翦伐滿手溪渚煙一肩邨塢

月親牽如手魚閒倚風蘋翠簡編吾已矣獨臥溪
風發

綸

涼沁織微颺時動垂綸影欲將數尺絲繫盡東流
迴海山眠六鼇頭角正輪困悲君力不任未足牽
連引

鈎

頗從寒女乞錘成折腰狀如登馬鐙山乙字剗奇
樣蕭蕭待頰尾奉餌如相餉竟日無所投蒼波月
痕漾

餌

悠然不可招濠濮歎高致豈知尚志人未絕口腹
累長身麀牙稻木甌香無譬豈惟尾鬣翁破鼻吾
涎墜

曾篴

秋風吹枳橘烟雨迷菰蔣手編松與杉密栗凌眇
茫不見跪餌迹伊人水中央吾道儻卜終乘茲偕
狷狂

鴉船

越舫如流萍腥風亂雙槳一片水墨雲點染青沆

漉翻飛似鼓舞汨沒爭雄長慚君牙後物屢卻鮫人享

跳白

粉尺界沈潭載盡片月白蒼波萬層中跳蕩有銀尺沙牙白鷺舉泛泛鬪霜翮夜靜水蕪寒不知船尾客

魚標

隔水似建牙前溪如樹羽荻花月午時避盡鷗呀艣江南狝獺多賴此干戚舞惜哉包禍心下有千鈞弩

甕浮

春江鱖魚時以酒甕為浮繫絲網出沒波際遠望如江朧然

春江浮嫩漲萬里馴鷗來虛中守其口險巖誠悠哉千金中流壺一葦名僧杯霜刀待紅雪仰爾懸魚才

校衲

漁服也或云小袴江淮間漁人著禪無犢鼻想其遺制矣

看君碧莎裳鎮覺犢鼻煩沒踝而過膝泥橈何足論赤芾方縈紆在股空朱殷悲乎足下塵滄浪何處津

花籃

籠花以銜魚伏機內銜魚莫能逆出也

籬籬百花發盪漾成錦紋衰年似隔霧逸興思乘

雲寧知順機好觸械生煩
寃寄書與魴鱖蘋荷不利君

魚州

江南養塘魚切州如粉散水面飼之

采采山上綠日夕煩腰鎌
飄飄散平流驗喁魚口煩
相期滿北渚不妨童西巔
秣馬今秣魚馳驅追琴仙

蛤燈

長檠與短檠人間管喧劇
不如沙頭蛤亦照篷底
白月滿結瑤胎光輝動荒澤
莫貯嬾婦油前汀魚可拾

龜枕

榮光欲滿河有客篷籠中
圖範不解陳負得霜髮
髮請君枕中祕決我魚與龍
枕流有初願鑽爾徒相訂

柳條

滑還不可持拗得溪邊柳
于思賦讎歌以貫占爻
偶盤作同心結腹腴享諸舅
煮魚然綠枝溪雲滿
牕牖

換酒

翻風一尺帘奕奕縣深柳
作勞須快意雙魚忽在

手滿地落葉絲一帶寒溪溜行行煮酪尊歡顏醉
前有

易薪

南山秋木中天然有高侶隔溪聞喚聲擔綠在荒
渚船頭掀箬篷瓦盆有芳醕擇我笥中鮮畱薪自
歸去

煮魚

太湖羹法成炊烟白芳塘河魴與洧鯉自昔勝牢
羊膾殘恐能化鑠釜傍滄浪朱門欲醒酒何處求
新方

風

細穀生微波蕭蕭蓬鬢動一葉忽如織漫亂誰能
鞚江南鯉魚信往往扁舟縱滿網復滿艙歸溪疾
如夢

月

濃林不暗溪爽心任飄泊東流足疎光我已知魚
樂方諸縣片瓊爲我餌與藥冰潭盡網收恐并員
蟾落

曉

冥濛蘆葦深中聞欠申叟理曾下坡陀無語溪聲

潘一犬吠遙邨三星猶在留爲掬滄波清暫洗衰蓬首

晚

得魚本不賣收具寒潭中浮雲淹忽馳我亦歸茅蓬
晚天佛頭綠落日魚眼紅浦頭有隙地可許袁郎同

漁人

上洞有佳客西塞成幽居奔蹄笑五絃鼓柷哀三閭
石頭眇高致稽亭鬱良圖塵隱恐犧服玄真誠鶴車
蘆碕非達人拏音吾所於騫生授釣具鴟夸

傳新書搖竿入烟水幽操傳江湖悠悠非我者莫笑不知魚

寄答邵子湘二首

選一

夫容湖上邵髯翁名位玄真桑苧中京雒聲華懷漫刺
江湖思緒趁歸鴻春田一頃豆花雨晴屋三間梅子風老
邵謝敷星下客鶴書何日兩輪紅

九日

閒居愛重九孤抱喜風陰小步野花亂讀書秋院深
晚天寒有意霜木瘦無心交際平生失樽前思不任

言選卷十五
十七
賂酒石歌

顧萊翁春江草堂物賂貯也本元次山石魚湖序

昔人漉酒除輕巾此獨用石重不倫南山采葛日
盈腹不如廣漠刈雲根昔人作杯用良玉此獨用
石觀不足奉盈束縛顛狂身不如頑朴挖幽谷安
得巨靈復生五丁活輦石刻作樽竦質衡廬東南
奠太華西北兀直如列雅爲三臚椀七就中杜舉
崑崙觴反坫別成瀛海一殘羹剩炙吾已倦鎮欲
避人來隱橘平時讀書多繆悞送客畱髡傾一石
先生文壇老飛將飲羽刺泉何赫赫驅使天漿萬
斛來正如隨地文源出定施瀛洲蘊玉膏塵埃變

我卑凡骨可能醞釀成縉紳正恐昏酣忘日月君
不見浯溪唐亭漫浪翁魚樽鳧舫間情重春陵一
首勝繪告卽今海國多飛鴻諸公出手灑餘瀝潤
此病渴干罷癢此石刻作醉道士任渠捧腹顛春
風頻吹江水與添益麴生醉倒將無同

送梁鎮海明府

頽巾白髮兩衰翁京雒盤踞觥籌中樺枝見跋未
肯起酒邊坐看西牆紅滿廳鼓篳歌聲沸碌碌諸
君莫憔悴玉衫對舉郎當腹自去冠紳操百戲字
老搽旦喬面爲不管屏邊笑如佛明朝仗下爭流

傳一時天謫雙飛仙熱官喘如竹筒吹亦思荷甕
相從焉而今快事東流往使我衰親悲復想寥落
黃公舊酒家猶說當年兩官長兩家子弟較賢愚
業已豬龍成異像我方被褐悲塗窮目逆君騎明
繡鞅秋風相見寒生衣天涯一樽相對時劉伶昔
無繼述兒今者或可補此奇粵西炎瘴初消歇王
程迫促君須別百里雖同駕鼓車割雞要作鯨鵬
掣君家家尊清節高歸請衰親爲君說

商丘大中丞寓齋觀明宣宗黑白二鼠圖

高齋閒敞邗江濱紅檉小几無埃塵卻立况有班

劍人何物上案登梓行昔者隆準太祖孫手提圖
籙當乾坤寶跗妙蹟世莫倫揮毫幻出竊齧身一
行欲前勢復蹲一似避匿穿墉奔一體兌色清如
冰一秉正氣衣元纁唧啾小語若可聞欲穴寢廟
窺鬣盆錦窠裝襜潔可捫似此尚是無牙君吾聞
宣皇業崢嶸蹇夏論道揚歌賡滌除貪穢何諄諄
窒塞倖路官箴清此輩意態如火明肢體毛髮傳
其形麥須豆眼瞭然存鑄鼎象物神姦驚縱有甘
口惡不悛白日官許行成羣洪永大業誰陶鈞賴
此敏手工渲皴後來爾雅蟲魚煩謂酌謂豹忘其

眞白日據社不可熏女奴飽食睡思昏米脂盜食
倉與困瓠肥不容丞相嗔一時暴鬪黠鼠掀偷人
目睛王其民衣冠齧碎食單貧此物與器同繽紛
周之成康漢景文唐稱貞觀宋仁神星羅碁布如
排勻若宣豈是尋常生豳圖織婦歌南薰猗蘭招
飲頒羣臣以類考之不待論公平東里光榮新

除夕再疊東坡歲事韻三首

小筵奉家尊更邀兄姪佐子女璠璣資列若五都
貨菘爲命縷長餅學栲栳大連斟百分空不許雙
箸臥家人有勝遊遂當北海座行年卜樗神骰槃

轉如磨殷憂自山兀強笑若電過沿牆賣懵兒我
欲商聲和

人皆巧因速我以拙故遲天衢逝驟耳欲以跛鼈
追不聞夸父強渴死天之涯年加是減日老至無
歸時蒿萊縱非病糠稃何足肥空翻破車軸漫作
窮塗悲家人戒時節刺促毋費詞恒言遂稱老媿
益偏親衰

暮天如潑墨掣曳千金蛇珠斗亂零落濃雲不能
遮縣官禁爆竹奈此浮俗何我獨架松盆臚膊亦
懽譁酒樽冷皤腹盆側勤炭搗缶鳴吾歌成醉眼

從欹斜欄年有清雨十斛寧蹉跎飯軟得長閒書

棚吾爾誇

除夕雨謂之欄年雨

早春幽居

嬾從輪鞅熱終日閉閒扉細雨濕春意幽花寒裊衣開書懷抱冷逢客笑言稀小庾自縈思扁舟春水肥

東坡生日詩

小序

臘月十九日東坡生辰商丘大中丞率吳下名士陳先生笠屐圖於庭致集中名物以祭更賦詩侑焉東坡以絕物之才顛倒困頓不獲展於

世當其失意知者排擠唯恐不至於死而不知者則以為知書一宰官耳豈知數百年後名公碩儒慨想遙慕有事之如生如此者耶然非有深企於古人與之符節相合而又有有為之力足以驚動凡俗則其事乃雖舉焉而不稱故古人之永新其名有幸不幸也先是中丞建滄浪亭於其遺址一時婦孺皆知有子美其人今既表彰施氏之說為蘇門功臣而又致欽仰之意於不已豈非有深企於斯人焉者歟夫有深企於東坡之人則其人亦東坡也已世有東坡而

若元鈺者可不在秦黃之列歟故爲詩壽東坡
非壽東坡之永其名壽其更有後身大獲於天
以補平生不足也詩曰

人生百年寄鬢鬢

用坡句

請公莫歎葭中草不見康

熙三十有九年臘月十有九日有客介壽陳笙竽
逆數磨蝎化生迄今茲甲子不暇籌算區人間遂
有七百餘歲叟異事驚倒園冠儒人生苟無物壽
世騎鶴跨鯉何爲乎如公真有不貪寶照耀塵世
無時渝我有轉語詫時輩去來彈指真須臾西陂
今有放鴨宋東坡故是扶犁蘇二者是二卽是一

吟詩莫信公忘吾不然公之誕日亦何有爲壽若
在公堂隅花豬自許上刀几竹籟亦遣親庖廚苦
茶薄酒在脩壘黃瓜紫李陳杯盃一措華巾竹几
備九峰怪石銅盤俱枕椰入手似當日藥玉挨柁
應時須元修令字寵蔬菜真乙佳號榮樽壺左圖
右畫盡遺筆

原倡左圖右
畫款寶氣

不媿衫袖窮年烏隻鷄斗

酒有燔者斜陽路口寧非夫可有秦黃作上客不
妨四座兼黎符鶴飛新聲裂江水紫裘仙吏真吾
徒赤壁磯頭一筵橫郭生不在知音無

滄浪亭卽事

丘亭獨媚烟春空半奩新漲磨青銅小約臥欄橫
十二似邀行路遊情通柳絲披披花靨靨菜蘩亦
欲誇春工清明已過上巳近人間樂事無時窮南
鄰梳頭北舍喚春衣乍綠裊能紅襄陽大隄未足
羨曲江小隊何能雄稠餳乳酪喚不歇餅爐茶竈
行相逢磨喝穀板競去客短簫細鼓愁歸童斬王
殿前芍藥架步碕檐外辛夸叢錦帳將懸牡丹坼
寶珠驟裂山茶烘

石枰精舍前牡丹中丞移種有名錦帳芙蓉者絕麗

蓊蓊香澤蕩

寥廓泛泛歌吹來空濛人登春臺自栩栩衆瞻化
日何融融渾忘此興始開府欲歌何有于吾公我

來亭心轉磨看四際太廢雙清瞳炊烟一碧萬鱗
次疊嶂亂翠千龍從雙塔律兀乳牯角九衢歷亂
蝸牛蹤平生一室媿雌守此日萬戶膺雄封禪寮
喜遇田衣客爲我高興橫霜桐獨關幽房拂素几
眞味數有銀絲供楚然戶外足音滿隔壁貼耳人
重重二雛迴環備餅錫有一妙指參師功傾身正
敵漆面短放手未及金徽終玉音聞遠蕩我意不
知老趣來何從能令人間箏笛耳一洗俗撥如吹
蓬吾人同在苦空裏未焚波律塵埃蒙直須善手
插衫裏時彈滿匣冰泉滾滄浪之水何漪漪琴中

有物將無同清兮可以濯吾纓冷然與爾乘遙風
佳辰勝地得妙藝布颿不負來江東

小滄浪聚飲四首 選一

綠柳縹煙暗戟扉黃鸝未過語禽稀飛花待得春
如雪二寸紅魚特地肥

近游二首 選一

已向山中閒聽雪更於碕上飽觀魚近游無限題

顏字都上雷峰寄妹書

妹吳送余詩云如登大雷岸應有寄來書

瓜渚阻雨呈菜翁

豈有空江鬼神入啾啾夜雨閒愁濕飛夢江南紫

翠重冷雲正護鶯聲澀江妃颺母弄囊鏡石郎玉
女誇衫笠瓦官閣外百尺浪未若丁三廟前急廟
中亦有礮礮聲欲鬪喧轟吟五粒烏狔劃水鏡面
碎海鳥吹波總干立戲驅無限白頭翁向我傾身
俯尻揖數年閉置不依劉四海馨聲今仰習澄江
如練賦不成染指從公乞餘汁

吳船竹枝歌二十五首

季春遊吳作
選七

疎疎紅日透篷明日午菜花香裏行船尾香杭炊
已熟起來扶艣臉霞生

烈婦祠前風雨急真孃墓下花柳濃兩處吳船都

歇得阿孃心意許誰儂

湖心湧起小金山秦家園子看泉還 皇王當朝

山斷錫春深遊女盡金環

船頭纍纍雞子白船尾解解菱孫烏五都塵客不曾識江南水市天下無

忙殺沙頭水勃公沙頭日日舞裙紅唐家火鴨金家酒喚取江南盛小叢

七里塘頭花雪飛賣花女兒似花枝上客買花須買得不須緩頰問奴誰

海棠輕豔似秋霞腥腥染血蜀山茶交藤夜合教

君買不賣將離芍藥花

十番詞

秋烟絡空月如水小氎紅雲吹不起酒闌歌倦燈
炮紅滉漾一聲羣耳喜鼓師雙杖縣黃檀兩手病
瘋頭青山篴奴揭調飛霜吻不怕空雲裂成粉雙
銅戛手如風颭間以丁星響嘈雜紅魚數鳴板稀
打小鑼荒大鑼啞幺頭風韻似聯珠七事爭能
不相下初如秋檐滴淋漓又似晴空雲斷續忽聞
萬騎宵同馳手如急雨心不知茫洋醉骨蕩無主
似見蓮心柘支支繡窠齊露彩雲飛風際落花開

復聚迴旋頓

于鴻縱處鼓牀疑碎乳孤程壯

士歸飛鳥

魚江浩眇鯨聲促節正宜人萬

負忍七

七酌橋西半塘寺紅簾小舫圍珠

于有新聲常恐惺靄畫脂記何年此曲

成今肩又撒圓輦彈雨雪

流水

流水悠悠去住間桃花紅影送舟還布帘小酒澆

愁罷惆悵斜陽一崦山

傾蓋亭

禾黍郊城道淒風人草草不見傾蓋賢秋原亭榭

